

北
鎮
縣
志



卷三

人物

自來政治修明罔不於人材倍加珍重良有芳躅昭垂能使後之人聞風興起於造士作人裨益滋巨北鎮近接閭山鍾靈毓秀遼金以降達官顯宦代有英奇近百年來雖傳列儒林勲垂竹帛者未能數觀而經明行修文章道藝足以矜式來茲者亦指不勝屈裒而集之庶可垂後賢軌範希古抗心追蹤先哲其在繼起之英乎附記方外藉存穎異志人物第二

名宦

漢

耿暉 字季遇耿恭之孫也順帝時為烏桓校尉破敵有功鮮卑震怖數萬人赴遼東降及敵寇遼東屬國暉移屯無慮城以拒之威振北方後遷度遼將軍

金

伊喇子敬 字同文遼五院人熙宗皇統間與修遼史除同知遼州事舊本廳自有占地歲入數百貫子敬曰已有公田何為更取民田竟不取及為興中尹子敬女自懿州來省謁中途遇盜剽行李且盡既而還之曰我輩初不知為府尹家也尹有德於民尚忍

侵犯耶後子敬歷咸平廣寧尹致仕卒時家無餘財

圖克坦繹 上京阿勒楚喀達哈人尚熙宗女潘國公主歷宣德

泰安淄州刺史世宗時改同知廣寧府事歷遷棗州防禦使所至
以政績聞升臨海軍節度使

裕爾伯特 北京路庫本明安托囉山穆昆人以功擢海濱令廉
能稱職章宗明昌六年除東北路招討使時北邊有警圍慶州伯
特率本路兵往救敵解去承安元年授鎮軍節度使以六羣牧人
叛改寧昌軍伯特為都統領步騎萬人至懿州奮擊大敗之二年
糾軍千餘出沒剽掠錦懿間伯特追敗之復獲所掠悉還本戶五
年知廣寧府改東北路招討使捍邊有功三遷為崇義軍節度使

伯特勇決善戰自幼以軍功顯任兵鎮十餘年所向克捷

伊喇富森 東北路烏爾呼河明安人以廕補吏累功遷順義軍節度副使衛紹王大安初遷沃州刺使同知興中府事富城繕城浚壕百姓頗怨頃之兵果至攻北城富森戰於北使備西城薄暮賊果攻其西以有備乃解尋改廣寧府富森被牒往鄰郡賊來攻之富森子銅和尚率家奴與戰城賴以完富森歸悉放奴為良終不言其子之功未幾充遼東宣撫使歲大饑出沿海倉粟先賑而後奏之優詔獎諭

盧孝儉 宣德州人初登天眷進士官太原少尹世宗大定中用廉進官二階遷同知廣寧尹廣寧大饑民多流亡孝儉設法救濟

全活甚衆

李完 字全道朔州馬邑人經童出身復登詞賦進士章宗明昌中同知廣寧府初遼濱人崔元入城飲酒不歸後得屍水中有司執同飲者訊之皆誣服提刑司疑其寃以獄畀完完廉得其賊乃舟師也遂免同飲者遷北京臨潢路提刑副使

高楨 遼陽渤海人少好學嘗業進士幹魯討高永昌已下瀋陽楨以母在瀋遂降幹魯以楨同知東京留守事天會六年以尚書左僕射判廣寧尹在鎮八年政令肅清吏畏而民懷之為中京留守平寇盜嚴禁令權貴皆震懾及在臺省彈劾無所畏避累封河內郡王卒年六十九楨性方嚴家無聲伎雖甚暑未嘗解衣緩帶

對妻孥默坐終日不一談笑其簡默如此

元

郭嘉 字元禮濮陽人泰定三年進士為廣寧路總管時盜起軍興民苦轉輸吏胥因緣為奸嘉設法計戶口第甲乙民甚便之募義兵數千教以坐作進退齊號令信賞罰東方諸郡糧富兵足惟嘉為最既而遼陽陷孤城無援嘉竭私財犒軍中義勇者誓以死守頃之賊至大呼城下曰遼陽已失何不降嘉一矢斃之賊稍引退遂開西門逐賊賊大至嘉力戰死贈太原郡公謚忠烈

明

劉江 南直隸應天府人永樂進士十七年任遼東總兵官巡視

諸島相地形於金州衛之望海塢築城堡立烟整一日望者報敵至江令官軍赴塢備之明日敵船數千直逼塢下江犒師秣馬伏兵山下遣壯士潛燒敵船截其歸路令曰旗舉礮鳴伏兵奮擊不用命者軍法從事已而敵至伏兵盡起敵大敗奔櫻桃園空堡中將士請入堡勦殺江仍分兩翼夾攻斬殺無遺自是敵不敢犯遼封廣寧伯及廣寧侯

王祥 河南固始人宣德時以都指揮僉事任廣寧開府僉書修築寧遠蒲河等城掌遼東事恤下興學頗多善政

李英 其先盧龍人遷義州成化中為廣寧中屯衛指揮歷左軍都督僉事充右參將分守錦義二城講武恤士訓練之暇以書史

自娛敦尚古禮建祠宇謹祭祀一以朱子為法在任七年百度俱舉

曾銑

南直隸江都人嘉靖十四年擢巡按遼東時都御史呂經

苛急為政軍士遂叛銑按部至復州聞變即還入城開諭禍福以安之是月丙申廣寧撫順兵變銑各檄示撫安密授諸將以計謀擒渠魁七月甲子銑行射禮文武畢至忽出袖中姓名分令官卒捕之逾時縛八人至明日擒撫順為變者七人計殺廣寧賊首擒十二人不假兵革三城肅清遼人廟祀之

馬永

直隸遷安人嘉靖十四年為遼東總兵官遼東自軍變後

首惡雖誅漏網者衆悍卒無所憚動懷不逞廣寧卒佟伏張鑑等

乘旱饑倡衆為亂諸營憚永無敢應者伏等登樵樓鳴鼓大噪永率家衆仰攻盡殲之永善用兵且廉潔卒於官遼人為罷市立祠殷尚質直隸天津衛人嘉靖中為遼東副總兵就進充總兵官三十五年達喇蘇以十餘萬騎入廣寧尚質禦之塔兒山殊死戰力屈而死贈少保左都督諡忠敏

閻懋官定遼右衛人嘉靖中為中路游擊三十五年達喇蘇以十餘萬騎入廣寧總兵殷尚質急率懋官禦之塔兒山敵先突懋官營不為動乃馳攻尚質懋官馳救遂戰死初懋官父振先為參將陣亡懋官繼之世濟忠貞事聞贈都督同知廕子立祠

周斯盛陝西寧州人嘉靖進士巡按遼東時霖雨盛禾湮沒軍

民饑甚亟開倉賑給索庫得贖金並可貸者萬餘兩訪素有積貯者量子之金俾出穀平糶更疏請發帑賑濟全活甚衆土寇犯廣寧斯盛身先士卒戰六晝夜卒安定之

馮時泰 山西汾州人神宗時任廣寧道兵備參議守正不阿築大定老軍臺堡數十處區畫有方及邊隅告警主帥失機時泰奉旨勘實有忤當事遂被逮遼民無不稱冤欲詣闕聲枉總督顧養謙止之疏為時泰申雪宰相趙志臯等亦交章力爭竟不白

李成梁 字汝契以世職家鐵嶺少貧年四十始襲職穆宗隆慶四年積功擢遼東總兵官駐節廣寧至任乃大修戰備甄拔將校收召健兒用為選鋒軍聲始振神宗萬曆元年建州王杲大舉入

成梁檄諸將禦之杲大敗走南關王台執以獻斬之五年速把亥
會土蠻等攻東昌堡成梁遣諸將遏其衝親提銳卒直搗圍山敵
皆倉皇遁出塞論功封寧遠伯七年土蠻與速把亥寇前屯錦義
等處成梁踰塞抵其營擊敗之八年迤東都督王兀堂犯鞏陽及
黃岡嶺復從永甸寬甸入成梁擊敗之兀堂由是不振九年土蠻
先後與黑石炭速把亥等攻圍廣寧不克轉掠圍山堡盤山等驛
攻義州成梁禦之陣斬速把亥寇大奔十九年成梁乘給事侯先
春閱視謀邀搗巢功使李寧等出塞潛襲板升師還遇伏死者數
千人匿不上聞胡克儉盡發其先後欺罔狀成梁由是不安於位
再疏辭疾其年十一月解任成梁鎮遼二十年先後奏大捷者十

邊帥武功之盛罕與倫比二十九年以沈一貫言乃命再鎮遼東
年已七十六矣再鎮八年遼左少事叙勞官至太傅久之卒年九
十弟成材參將子如松如柏如楨如樟如梅皆總兵官如梓如梧
如桂如楠亦皆至參將

熊廷弼

湖廣江夏人神宗三十六年巡按遼東杜饋遺核軍實

時巡撫趙楫等棄寬甸新疆徙邊民六萬家於內地廷弼勘得棄
地驅民狀劾二人罪歲大旱廷弼行部金州禱城隍神約七日雨
不雨毀其廟及廣寧踰三日大書白牌封劍使使往斬之未至風
雷大作雨如注遼人以為至誠感神天啟時為御史馮三元等劾
罷去任遼士民莫不垂泣後以廣寧失守論誅清乾隆時錄其裔

孫泗先授教諭

張承蔭 陝西榆林衛人官遼東總兵官神宗四十六年清兵破撫順關承蔭赴援力戰死同時戰歿者廣寧副總兵頗廷相參將蒲世芳游擊梁汝貴千總王命印清乾隆時賜承蔭諡忠烈廷相世芳汝貴俱諡烈愍命印諡節愍

高邦佐 山西襄陵人天啟元年遼陽破以邦佐為布政司參政分守廣寧邦佐知邊事不可為乞歸方報允而王化貞棄廣寧逃衆謂邦佐既請告可入關邦佐叱之曰吾一日未去則一日封疆臣也夜作書訣母策騎趨右屯謁熊廷弼言城中雖亂外間未知亟提兵入城斬一二人人心自定公即不行請授邦佐兵赴難廷

弼不聽偕化貞並走邦佐仰天嘆泣曰經略巡撫俱逃事去矣松
山吾守地當死此遂西向拜闕復拜母解印綬自經官舍僕高永
曰主人死安可無從者亦自經於側事聞再贈太僕卿同時顧頤
以分守遼海道右參政分守遼陽城破力屈自經贈太僕少卿清
乾隆時賜邦佐頤俱諡節愍

清

項 蕙 佚其字康熙十九年以名進士出知廣寧縣居官清廉
正已率物政暇行鄉飲酒禮延訪紳耆詢民疾苦諄諄如家人語
縣界邊陲文化未開乃創建義學以資提倡厥後文明進步鄉村
子弟咸知向學皆公啟之也

興 秦 吉林滿州人道光年知廣寧縣事任事勤敏政簡刑輕
倡修西門外河堤數百丈保護城垣永除水患遺碑尚在子銘安
署吉林將軍孫那桐官至大學士

煜 斌 佚其字清宗室同治三年署廣寧知縣在官有惠政聽
斷如神春秋巡行阡陌問民疾苦戴白垂髻環集聚觀靡不嘖嘖
稱道之四年八月間有大盜馬傻子等糾衆千餘人焚掠黑山鎮
進據中安堡令市民李尚珍入城說尉令曰苟以金帛彈藥賂我
則越境他去否則屠城或懼甚欲迎降煜斌堅持不可適吉林副
都統花里雅春率騎二百回吉林原防聞之遂入城與尉令共商
守禦煜斌乃抽壯丁備器械率商民晝夜登陴嚴行抵禦無何獄

內火起犯人皆逸出公聞變冠服上堂誓自盡被囚犯負之出得不死其夫人死之嗣逸犯為花里雅春兵勒殺殆盡外寇不得逞旋亦遁去城賴以安其餘詳見大事記

劉汝新 遺其字道咸間以名進士任廣寧知縣工書法能文章

案牘之餘與諸生講學論文娓娓不倦文翁治蜀不是過也性耽

書雖走卒下吏無弗應公之遺墨至今猶有存者持己清廉嗣以

虧歛罷官貧不能歸海城士紳聘主他山書院講席遂終老焉嘗

有句云片雲落照依時合一鳥遙天盡處飛猶想見公之風趣云

徐慶璋 字璵齋光緒初年曾署廣寧知縣潔已奉公愛民如子

嘗自題大堂楹聯云不聽情不愛錢一副冷面皮但知執法毋矜

才母使氣滿腔熱心血總期無刑書法亦矯健非常讀其聯想見其為人

談廣慶 字雲浦廣東駐防旗人以繙譯進士署廣寧知縣性坦
白和藹可親聽訟悉心推勘常至夜分俸境揣情錙銖不爽神明
之稱著於一時先是前令某姓貪縱凡民來納課者須先出錢百
文由倉胥給以執據乃發正票脫有遺失立予荷校需索無藝必
饜其欲乃止又軍餉火藥過境則遣家丁率胥役逮捕民車得賄
即縱之去以故鄉民間捕車之令咸惴惴焉引牛馬遠避坐是人
以大強盜呼之公至革陋規除積弊且為經久計民困始蘇簿書
之暇庭訓尤嚴每日黎明即起課子讀書無間寒暑厥後公子國

楫國桓皆以科第起家咸以為清白吏之報云

李景祥

字炳甫浙江鄞縣人清光緒乙未進士初蒞廣寧延訪

紳耆勤求民隱輿論翕然縣多盜陰倚豪右為護符公廉得其實
悉寘諸法盜賊屏迹政暇輒提倡文化集士子而月課之校量文
藝手自改竄不以為疲邑東二十里鋪李張氏年十九為其舅姑
考掠以死事將寢矣公微行迹而得之訊知其舅淫而不父卒蔽
其辜而旌其婦且作烈婦詞一篇至今猶傳誦之公性嚴明遇變
胸有定力庚子秋俄軍據奉天乘勝而西銳不可當風聲鶴淚一
夕數驚八月二十一日訛言益甚城內居民遷徙幾空公乃將封
獄中輕繫重囚盡行開釋以靖內訌雍容坐鎮以死自矢城賴以

安辛丑春俄兵入城託覓宿舍實行搜括人心洶洶變在頃刻有
孔某者為虎作倀勢張甚公立斬以徇俄人為之錯愕遂悉遵約
束越宿而去夏五月渠魁某欲反正而無由乃於平明城門甫啟
率其黨百餘人以入時衛隊悉鼠竄公獨坐堂皇某望見即下拜
公厲聲曰鼠輩反耶某曰不敢特來投誠耳請公巡視某劾前驅
公遂出見市肆不驚秋毫不犯乃許其請立遣之出蓋恐遲則變
生也公豐軀偉幹貌森嚴凜凜不可犯而慈祥愷悌出於天性歷
久愈不能忘甲辰正月以勞瘁卒於官商民罷市三日向之受撫
者悉哀經哭臨如喪考妣邑人呈請大吏准付國史館立傳

劉德全

字心齋清光緒乙未進士天性坦率不修邊幅人以劉

瘋子呼之初到任不以家累自隨無僮從親司炊爨與其甥某偕
來冬祇一裘甥舅恒易衣而出淡泊清貧儼同寒士公每風興無
仕途竊情之習晨起見儀門內人語嘈雜就詢之曰民等納糧故
預來守候耳時書吏尚酣寢公立促之起自是合署無敢晏起者
市坊失慎致兆焚如公聞警躬往督警竭力救護火息乃罷未幾
大吏嘉其廉超遷以去至今猶稱廉吏者以公為首云

耆舊

遼

耶律貝 小字托雲太祖長子母瀉欽皇后舒魯氏幼聰敏好學
外寬內摯神冊元年春立為皇太子時太祖問侍臣曰受天之君
當事天敬神有大功德者朕欲祀之何先皆以佛對太祖曰佛非
中國教貝曰孔子大聖萬世所尊宜先太祖大悅即建孔子廟詔
皇太子春秋釋奠嘗從征烏爾古黨項為先鋒都統及經略燕地
太祖西征留貝守京師因陳取渤海計天顯元年從征渤海拔扶
餘城上欲括戶口貝諫曰今始得地而料民民必不安若乘破竹
之勢徑造輝罕城克之必矣太祖從之貝與大元帥德光為先鋒

夜圍輝罕城大誣譏窮蹙請降尋復叛太祖破之改其國曰東丹
名其城曰天福以貝為人皇王主之仍賜天子冠服建元甘露稱
制置左右大次四相及百官一用漢法歲貢布十五萬端馬千匹
上諭曰此城瀕海非可久居留汝撫治以見朕愛民之心駕將還
貝作歌以獻陞辭太祖曰得汝治東土吾復何憂貝號泣而出遂
如儀坤州未幾諸部多叛大元帥討平之太祖訃至貝即日奔赴
山陵貝知皇太后意欲立德光乃謂公卿曰大元帥功德及人神
中外攸屬宜主社稷乃與羣臣請於太后而讓位焉於是大元帥
即皇帝位是為太宗太宗既立見疑以東平為南京徙貝居之盡
遷其民又置衛士陰伺動靜貝既歸國命王繼遠撰建南京碑起

書樓于西宮作樂田園詩唐明宗聞之遣人跨海持書密召貝貝
因改海上使再至貝謂左右曰我以天下讓主上今反見疑不如
適他國以成吳泰伯之名立木海上刻詩曰小山壓大山大山全
無力羞見故鄉人從此投外國攜高美人載書浮海而去唐以天
子儀衛迎貝貝坐船殿衆官陪列上壽至汴見明宗明宗以莊宗
后夏氏妻之賜姓東丹名之曰慕華改瑞州為懷化軍拜懷化軍
節度使瑞慎等州觀察使復賜李姓名贊華移鎮滑州遙領虔州
節度使貝雖在異國常思其親問安之使不絕後明宗養子從珂
弒其君自立貝密報太宗曰從珂弒君盍討之及太宗立石敬瑭
為晉王加兵於洛從珂欲自焚召貝與俱貝不從遣壯丁李彥紳

害之時年三十八有一僧為收瘞之敬瑄入洛喪服臨哭以王禮
權厝後太宗改葬於醫巫閭山諡曰文武元皇王世宗即位諡讓
國皇帝陵曰顯陵統和中更諡文獻重熙二十年增諡文獻欽義
皇帝廟號義宗及諡二后曰端順曰柔貞貝初市書至萬卷藏於
醫巫閭絕頂之望海堂通陰陽知音律精醫藥砭熅之術工遼漢
文章嘗譯陰符經善畫本國人物如射騎獵雪騎千鹿圖皆入宋
秘府然性刻急好殺婢妾微過常加剋灼夏氏懼而求削髮為尼
五子長世宗次隆科舒隆先道隱

平王隆先 字團隱母大氏景宗即位始封平王未幾兼政事令
留守東京薄賦稅省刑獄恤鰥寡數薦賢能之士後與統軍耶律

實嚕同討高麗有功還薨葬醫巫閭山之道隱谷平王為人聰明博學能詩有閭苑集行于世保寧之季其子辰格與渤海官屬謀殺其父舉兵作亂上命輟裂于市

耶律良 字錫納小字蘇著帳郎君之後生於乾州讀書醫巫閭山學既博將入南山肄業友人止之曰爾無僕御驅馳千里縱聞見過人年亦垂暮今若即仕已有餘地良曰窮通命也非爾所知不聽留數年而歸重熙中補寢殿實達爾尋為燕趙國王近侍以家貧詔乘厩馬遷修起居注會獵秋山良進秋遊賦上嘉之清寧中上幸鴨子河作捕魚賦由是寵遇稍隆遷知制誥兼知部署司事奏請編御製詩文目曰清寧集上命良詩為慶會集親製其序

頃之為敦睦宮使兼權知皇太后宮諸局事良聞重元與子尼嚕古謀亂以帝篤於親愛不敢遽奏密言於皇太后太后託疾召帝白其事帝謂良曰汝欲間我骨肉耶良奏曰臣若忘言甘伏斧鑕陛下不早備恐墮賊計如召尼嚕古不來可卜其事帝從其言使者及門尼嚕古意欲害之羈於帳下使者以佩刀斷帶而出馳至行宮以狀聞帝始信亂卒以功遷漢人行宮都部署咸雍初同知南院樞密使事為特哩袞出知中京留守事未幾卒帝嗟悼遣重臣賻祭給葬具追封遼西郡王諡曰忠成

馬人望 字儼叔高祖允卿為石晉青州刺史太祖兵至堅守不降城破被執太祖義而釋之徙其族於醫巫閭山因家焉曾祖廷

煦南京留守祖淵中京副留守父銓中京文思使人望穎悟幼孤
長以才學稱咸雍中第進士為松山縣令歲運澤州官炭獨役松
山人望請於中京留守蕭托歡均役他邑托歡怒下吏繫及百日
復引詰之人望不屈蕭喜曰君為民如此後必大用以事聞於朝
悉從所請徙知涿州新城縣縣與宋接境驛道所從出人望治不
擾吏民畏愛近臣有聘宋還者帝問以外事多薦之擢中京度支
司鹽鐵判官轉南京三司度支判官公私兼裕遷警巡使京城訟
獄填委人望處決無一冤者會檢括戶口未兩旬而畢同知留守
蕭保先怪而問之人望曰民產若括之無遺他日必長厚歛之弊
大率十得六七足矣保先謝曰公慮遠吾不及也先是樞密使伊

遜竊弄威柄卒害太子及天祚嗣位將報父仇選人望與蕭報恩
究其事人望平心以處所活甚衆改土京副留守會劇賊趙鍾格
犯闕劫宮女御物人望率衆捕之右臂中矢炷以艾力疾馳逐賊
棄所掠而遁人望令關津譏察行旅悉獲其盜尋擢樞密都承旨
宰相耶律儼惡人望與己異遷南京諸宮提轄制置歲中為保靜
軍節度使有二吏凶暴民畏如虎人望假以辭色陰令發其事黥
配之是歲諸處饑乏惟人望所治粒食不闕路不鳴桴遥授彰義
軍節度使遷中京度支使始至府廩皆空視事半歲積粟十五萬
斛錢二十萬緡徙左散騎常侍累遷樞密直學士未幾拜參知政
事判南京三司使事時錢粟出納之弊惟燕為甚人望以縑帛為

通歷凡庫物出入皆使別籍名曰臨庫姦人黠吏莫得軒輊乃以
年老揚言道路朝論不察改南院宣徽使以示優老踰年天祚手
書宣馬宣徽四字詔之既至諭曰以卿為老誤聽也遂拜南院樞
密使人不敢干以私用人必公議所當與者如曹勇義虞仲文嘗
為奸人所擠人望推薦皆為名臣當時民所甚患者驛遞馬牛旗
鼓鄉正廳隸倉司之役至破產不能給人望使民出錢官自募役
時以為便久之請老以守司徒兼司中致仕卒諡曰文獻人望有
操守喜怒不形未嘗附麗求進初除執政家人賀之人望愀然曰
得勿喜失勿憂抗之甚高擠之必酷其畏慎如此

金

梁肅 字孟容廣寧奉聖州人幼勤學天眷二年擢進士調平遙主簿遷絳縣令以廉介聞後遷彰德節度營治汴宮肅分護役事攝大名少尹正隆末境內盜起百姓陷賊中不能自辯者數千人皆繫大名獄肅至官廉得其情讞出者十八九大定四年通檢東平大名兩路戶籍物力稱其平允他使者所至皆以苛刻增益為功百姓訴苦之朝廷勒諸路咸以東平大名通檢為準於是始定七年河決李固召肅視之遂奏決河水六分舊河水四分今塞決河復故道為一再決而南則南京憂再決而北則山東河北皆可憂不若止於李固南築隄使兩河分流以殺水勢世宗從之十四年充宋國詳問使稱旨遷濟南尹召拜參知政事肅知無不言致

仕卒謚正憲

耶律履 遼東丹王七世孫家廣寧方五歲時卧廡下見微雲往來天際忽謂乳母曰此所謂卧看青天行白雲者耶及長秀峙通悟博學多藝善屬文精曆算書繪事初舉進士惡搜檢煩瑣去之廕補承奉祇候國史院書寫推經史院編修世宗問朕讀貞觀政要見魏徵嘉謀忠節近世何故無如徵者對曰忠嘉之士何代無之在用不用耳世宗曰朕超用劉仲晦張汝震以其居諫識屢有忠言也安得謂之不用履曰海陵杜塞言路天下緘默成風願陛下懲艾前事開諫諍之門天下幸甚章宗好讀左傳召質所疑履曰左傳駁而不純尚書孟子聖賢純全之道願留意焉上嘉納之

後拜參知政事特賜大定三年孟崇榜下進士及第累官禮部尚書兼翰林院直學士明昌三年進尚書右丞卒諡文獻初族父德元未有子以履為後既而生子震德元歿盡推家資與之子辨材善材楚材皆有名

元

耶律楚材 字晉卿遼東丹王托雲八世孫金尚書右丞履之子也身長八尺美髯宏聲天資英邁博通天文地理曆律術數及釋老醫卜之說金貞祐三年為中都行省員外郎中都陷太祖召見處之左右從征西域製庚午元曆上之太祖每征必命之卜多奇驗嘗謂太宗曰此人天賜我家爾後軍國庶政當悉委之甲申兵

次東印度駐鐵門關侍衛見一獸如鹿而馬尾其色綠作人言曰
汝主宜早還太祖以問楚材對曰此瑞獸也其名角端解四方語
好生惡殺今大軍征西已四年上天降符以告陛下願承天心宥
此數國人命太祖遂還太宗即位楚材奏諸州縣長吏專理民事
萬戶府專總軍政課稅專掌錢穀各不相統攝著為令權貴不得
志遂為舒穆魯軒達布等構陷而太宗獨察其誣及軒達布獲罪
太宗命楚材鞫治楚材請寬之太宗私謂近侍曰楚材不較私讐
真長者汝曹當效之太宗至雲中諸路所貢課額銀幣及倉廩物
料文簿且陳於外悉符楚材原奏之數笑曰卿何使錢幣流入如
此即日授以中書省印事無鉅細悉以委之時民多誤觸禁網國

法無赦令楚材議請肆宥條便宜十八事太宗悉從之金汴京將下大將蘇布特請屠汴楚材馳見太宗曰得地無民將焉用之且弓矢甲仗金玉等匠及官民富貴之家皆聚此城殺之則一無所得是徒勞也於是百四十餘萬戶皆得保全又求得孔子五十一代孫襲封衍聖公付以廟地及楚材奏定賦稅朝臣皆謂太輕楚材曰將來必有以利進者則以為重矣楚材又奏制器者必用良工守成者必用儒臣請校試之乃命以經義詞賦論分為三科儒人被俘為奴者亦令就試其主匿勿遣者死得士凡四千三百人免為奴者四之一楚材又請一衡量立鈔法定均輸庶政畧備民稍蘇息太宗嗜酒楚材屢諫不聽乃持酒槽鐵口以獻曰此鐵為

酒所蝕尚致如此而况五臟太宗悟賞以金帛太宗疾篤脈已絕
皇后不知所為召楚材問之對曰今任使非人責官鬻獄囚繫非
辜者多宜赦天下后急欲行之楚材曰非君命不可頃之太宗少
蘇后以為言乃首肯赦發而脈生疾愈楚材以大乙數推之不宜
田獵為左右憊患遂出獵尋崩於行在皇后稱制温都爾哈瑪爾
專政用事有旨凡温都爾哈瑪爾所建白令史不為書者斷其手
楚材曰國之典故悉委老臣令史何與焉事若合理自當奉行如
有不可死且不避况斷手乎后不悅楚材憤悒而卒時有譖言天
下貢賦半入其家者后命近臣覆視之惟琴玩十餘及古今書畫
金石遺文數千卷而已楚材為相二十年正色立朝不避權勢每

陳國家利病生民休戚辭色懇切太宗嘗曰汝又欲為百姓哭耶
楚材每言興一利不若除一害生一事不若減一事人以為名言
至順初贈經國議制寅亮佐運功臣太師上柱國追封廣寧王諡
文正所著湛然居士集十四卷

耶律鑄 字成仲楚材子幼聰敏善屬文領中書省事採歷代德
政合於時宜者八十一章以進從憲宗征屢出奇計世祖中統
二年拜中書左丞相至元初加光祿大夫奏定法令三十七章更
民便之初清廟雅樂止有登歌詔鑄制宮懸八佾之舞樂成賜名
大成十年遷平章軍國重事監修國史朝廷有大事必諮訪焉卒
贈太師懿寧王諡文忠

耶律希亮 字明甫楚材之孫鑄之子九歲師北平趙衍未浹旬
已能賦詩至元八年授符寶郎十一年既平宋世祖問宋諸降將
曰日本可伐否皆曰可希亮曰干戈甫定人得息肩俟數年後興
師未晚世祖然之累遷吏部尚書至大中武宗訪求先朝舊臣特
授翰林學士承旨知制誥兼修國史乃類次世祖嘉言懿行以進
希亮性至孝額呼布格反時脅之西行困阨遐方家貲蕩盡僅藏
祖考畫像四時陳列致奠朔漠之人咸共嘉嘆雖疾不廢書史或
中夜起坐取燭以書所著詩文及從軍紀行錄三十卷目曰懷軒
集卒封漆水郡公諡忠嘉

耶律留哥 契丹人初仕金為北邊千戶太祖起兵朔方金人疑

遼遺民有他志令遼民一戶以二女直戶防之留哥不自安遁至
隆安韓州與耶的合兵十餘萬遂稱遼王改元元統盡有遼東諸
郡遂都咸平復與子薛閣奉金幣銀牌見帝帝大悅賜金虎符仍
命為遼王居廣寧府卒年五十六妻姚里氏佩虎符領其衆七年

明

賀欽 字克恭別號醫閭先生世縣定海其先戍廣寧後屯為遼
西人少穎敏沈厚好學偶得近思錄朝夕翫讀成化二年舉進士
為戶科給事中見白沙論學歎曰至性不顯寶藏猶霾世即我用
而我奚以為用即日上疏解官去執弟子禮事白沙既別肖其像
懸室中事之甚謹泰陵初薦授陝西參議撫治商洛以老病母憂

上疏懇辭且陳四事一曰資真儒以講聖學二曰薦賢才以輔治道謂新會縣歷事監生陳獻章天性高明學術純正誠當世之大賢為士大夫之矜式宜以非常之禮起或任內閣俾參大政或任經筵使養君德三曰遵祖訓以處內官謂內府監司局庫衛門載之祖訓內官條其職掌不過洒埽供養關防出入等事而已近如王振喜甯舒良王誠曹吉祥牛玉汪直尚銘梁芳陳喜輩或陷主沙漠身叛賊境或主易儲君禁錮南內或謀為不軌賄易后妃或邀功啟釁流毒邊徼或恃寵招權納賂不貲或引用左道蠱惑上心或導進淫巧盜虛府庫此其陷君誤國蠹政殃民昭昭在人耳目宜深鑒已往之弊內不可使職掌奏牘得預大政外不可使鎮

守地方掌握兵權則非惟國家無疆之福亦宦官無疆之福也四
曰興禮樂以化天下謂陛下紹基之初舉行朱子喪葬之禮但初
政之施方發其端而頽敗之俗尚仍其舊禮讓之化未行淫穢之
風日甚乞申明正禮之當行革去教坊之俗樂疏入報聞允公辭
正德四年逆瑾括田東人驚疑思亂義州以守臣貪故遂先發聚
衆縱火劫財大擾然相戒曰毋入東街驚賀黃門公聞往諭之曰
渠輩既知悔即不殺人可解鎮城當有人至爾輩直拜跪求生慎
勿殺人已而撫鎮人果至須臾有言軍至且剿者衆復呼諜曰賀
黃門無謾語又趨跪公里門公曰城中擾亂至此鎮城烏得不發
兵雖至爾等第不殺人必宥爾無恐衆遂定城中不傷一人公不

務博覽專讀五經四書小學靜思默識反身實踐冠婚喪祭遵用家禮每教人讀白鹿洞規小學鄉人由是興於行義老更好易究心象數手不釋卷卒鄉人祠之凌溪釣臺子士認鄉貢士博學篤行嘗陳十二事論王政不報辭疾歸終身不仕

畢恭 廣寧前屯衛人其先山東濟寧籍恭有文武才正統間以巡撫王翱薦授百戶歷指揮僉事圖上方略開設迤西邊堡墻壕增置烽堠兵威大振進署都指揮僉事守備寧前等衛在任五年邊鄙寧謐進掌都司撫士卒革姦弊廣屯田興學校政事平理軍民咸稱之所著有邊城吟稿

潘輔 廣寧人弘治六年進士授順天水清縣尹有冰蘖聲時

盜賊竊發境上緝捕有方畏威遠遁民皆安堵後卒於官

王春 廣寧左屯衛人弘治九年進士授翰林院檢討陞周府長史時宗室以巡撫勾稽廩祿聚眾往噪於門後因治兵備他盜宗室疑之皆挾兵自衛春啟王徧諭其故且止巡撫兵眾乃安有復庵詩集行世

傅鑰 字希準廣寧人正德六年進士授給事中嘗論邊事為尚書王瓊嘆服會宣大將領失利亡卒甚多廷議遣鑰覆視上曰是嘗言邊事者稱是選矣鑰至鎮考治甄別不隨不苛得實以報嘉靖間累陞山西按察使用法平恕兼得大體富民某殺人當死以貨免鑰收鞫之寘於法知縣某主簿某皆良更為姦人所構事不

按察司或謂鑰曰是當道所欲入也鑰曰法如此可枉徇乎竟白之終河南巡撫

李景登 廣寧人神宗二十年進士任猗氏縣才敏氣恬不以崖岸自異請除荒地課贍書生陞吏部主事出知漢中府冰操嚴潔明敏果斷蒞任三年案無留牘獄無沉滯

賈冕 廣寧衛人襲世職指揮尋舉武進士署都指揮僉事為中路游擊將軍嘉靖三十八年寇犯遠陽南抵海州冕督軍往禦力戰死焉贈都督僉事諡忠壯

黑春 其先建州人世職廣寧指揮使以功進署都指揮僉事歷遠陽副總兵嘉靖四十一年王果導寇分入春禦之身自搏戰

殺數十人敵棄資仗遁詔進三秩頃之寇掠陽站堡春逆擊乘勢
逐之陷伏中寇知其驍將圍之數重春與把總田耕等力戰二晝
夜援師不至死之贈都督僉事諡忠壯

郎得功 廣寧衛人世職指揮僉事進參將與總兵王治道同時
戰死贈都督同知得功父傑禦敵花兒營力戰死二弟賓寶諸子
得臣得君得恩及羣從數人皆戰死其妻並守節不嫁時論多之
趙傾葵 廣寧衛人嘉靖中為薊鎮參將三十四年寇犯馬蘭峪
傾葵往禦與指揮楮文明等俱力戰死贈都督同知諡忠壯

清

郎廷佐

隸鑲黃旗漢軍先世居廣寧父熙載為明諸生天命乙

年征廣寧熙載率遼河西四堡兵民來歸授備禦尋予三等輕車都尉世職廷佐其次子也崇德中以官學生授內院筆帖式順治二年官國史院侍講三年從肅親王豪格平四川六年從英親王阿濟格平大同誅叛鎮姜瓖是年遷秘書院學士十一年擢江西巡撫江西自明末游遭兵亂逋賦鉅萬廷佐再疏請蠲緩以蘇民困土賊洪國柱繆我章等剽掠驍州廣信間遣將勦平之十二年擢江南江西總督校閱江南賦籍積逋至四十餘萬曰此非盡民困不能輸也必有官吏侵蝕之而詭稱民逋者民困可矜官吏之弊不可不革覆覈之果盡得侵蝕狀而其弊相沿已久有司每視其所急以新舊賦互相抵飾愈糾紛不可釐治又令申本任徵賦

未完者皆予降調去官屢更代吏益因以為奸以故逋賦日積廷
佐乃籍之為三曰官侵曰吏蝕曰民逋專責右布政使分別督催
而以新賦責左布政使鈞稽其收納俾不得相抵飾並疏請征賦
未完應降調者令戴罪留任催徵以課實效於是宿弊頓為之革
江南故無備用船大軍經行皆取估舶以濟商賈頗觀望不前廷
佐請視江西發弊造船備用江南之有備用船自廷佐始也十六
年巡閱江海以海賊鄭成功方寇浙江沿海郡邑一揚帆即到江
南而江南汎兵單弱水師未習舟楫未具請撥鄰省勁兵以重海
防部議以鄰省無可撥者寢其事不行已而成功竟陷鎮江襲瓜
州犯江寧江寧兵少不足禦會副都統噶楚哈等自貴州旋師沿

江而下廷佐與駐防總管喀喀穆邀入城共擊賊挫其前鋒獲舟
二十餘偽印二成功旋率衆大至屯於岳廟山連營八十有三艘
腫蔽江廷佐等登陣固守及所檄援兵俱集遂與諸將定議以騎
兵繞山後攻其背以步卒開神策門攻其前以舟師斷其歸路而
令副將梁化鳳夜穴儀鳳門出銜枚襲偽總統余新營新就執成
功已氣奪比旦前後兵並起夾擊陣擒偽提督甘輝偽總兵張祿
郭良玉縱火焚賊艘五百餘成功遁入海捷文下詔深褒獎之聖
祖即位分設江南江西總督二以廷佐專督江南康熙四年仍兼
督江西七年以疾解任十三年逆藩耿精忠據福建叛特遣廷佐
為福建總統廷佐受命發憤矢志殲賊上言臣孫娶于耿氏臣與

精忠有連然臣誓不與賊俱生願力疾前驅縛精忠歸獻闕下聖
祖嘉之賜鞍馬甲冑以寵其行廷佐至浙江賊已盡陷福建不得
進乃從康親王傑書駐金華以禦賊十五年卒於軍賜祭葬如典
禮紀江西名宦祠

丁文盛 廣寧人初為明諸生天命六年來歸隸鑲黃旗漢軍崇
德三年任兵部啟忒郎順治元年授登萊兵備道二年擢山東巡
撫濰縣賊張廣犯萊州遣將擊敗之於三埠又敗之紅山廣奔平
度追及於徐里曠射殪之賊平文盛蒞東省凡三年當兵村燹後
落多墟乃專事安輯請蠲牙稅雜稅請肅郵政以節存經費市馬
不得派累問閭請清理刑獄請核臨清東昌平山諸衛兵虛額請

裁虛額以重軍實皆下所司議行於是明季弊政釐革殆盡會荏平高唐禹城武城新城諸邑為土賊所擾文盛請發勁旅勦之給事中林起龍御史金元楨交章責文盛不能弭賊部議當革職世祖特寬之降授河南按察使六年遷福建布政使七年卒於官

郎永清 廣寧人隸鑲黃旗漢軍順治六年知山西渾源州時叛

鎮姜瓖初平永清招集流亡詳請豁免逋賦萬餘兩十年知江西贛州府贛自丙戌城破復連歲用兵閩廣民多轉徙永清勤招徠嚴約束復業者日衆大軍之討李定國郝尚九也道經贛飼馬以行永清預度城南演武場為營柵芻糧畢備而自往萬安迎大帥陳說郡當新定不宜騷動之故帥感其言下令不許一兵入城瑞

金石城被寇害最甚為民營室廬瘞肉骼歲洊饑發粟往賑贛諸
生王曰旦為盜所引不勝刑誣服永清廉其枉出之又雪興國民
廖安民之獄在官四年贛人立祠祀之後歷山東按察使湖南布
政使湖廣開藩南省自永清始也時干戈初靖永清招來撫育民
得安堵永寶諸郡溪流悍急歲漕為艱力請改浙湘衡以南舊食
粵鹽灘險道遠商民交病申請改食淮鹽至今稱便後擢山東巡
撫士民追維遺愛建專祠撫臣趙申喬為記長子廷樞任粵東臬
司有清望次子廷極歷任漕運總督卒諡溫勤

丁思孔 文盛子隸鑲黃旗漢軍順治壬辰進士初任弘文院庶
吉士內國史院侍講康熙八年授直隸分巡道出納平允吏胥不

能為奸大軍南征供億填溢思孔措辦有方毫不擾民十四年擢江西按察使旋升布政使督臣于成龍疏薦二十二年擢偏沅巡撫修嶽麓書院成二十七年湖廣裁兵夏逢龍因裁缺候補作亂副將傅爾學等應之叛踞武昌時思孔由河南巡撫調撫湖北籌餉充裕分兵勦擒賊渠受首擢湖廣總督三十三年調雲貴總督卒於官賜祭葬如例祀江南湖廣名宦

王之佐 隸鑲黃旗漢軍世居廣寧康熙初任寧化令時海氛未靖二十年王師十萬駐漳州日餉千斛上游飛輓派役民夫之佐念民疲差重設法調劑隨時補救以蘇民困會有黃機者受吳三桂為劄脅其鄉黨從逆揚地一鄉不從遂圍而屠之之佐請兵會

勦時大軍與海賊相持難以聚移之佐力請于督撫調三鎮兵會
勦值同安告急督撫有難意之佐言不可驕賊以致民遭糜爛聲
淚交迸督撫鑒其誠許之之佐遂部率鄉兵躬為嚮導感賊壘分
攻之賊盡棄其衆越贛石入江西投誠江西撫臣納之發符護賊
還寧化之佐堅不奉檄昌言於大吏曰閩賊即江賊也若閩賊入
江即當宥死江賊入浙又應偷生王法將誰加乎如謂法外省過
以招不廷則自江納之即自江用之今名寄江籍而身返閩巢閩
之文武何顏臨之乎大吏避其言遂搗其巢穴以兵截洞口絕其
歸路賊遂氣沮黨類星散之佐戮力行間每領兵數千旦夕巡行
營壘聯客師為指臂市井肅若無人後以勞得寒疾卒軍民罷市

巷哭者三日崇祀本縣名宦祠

于宗堯 廣寧人隸鑲黃旗漢軍康熙七年年十九以廕補常熟令勇於為治興利剔弊雖老吏勿能及邑素苦於漕宗堯視事三月盡除其害三年卒於官邑為罷市男女巷哭醵金治其喪負販者皆投一錢柩將歸百姓遮道留之葬虞山南麓題其阡曰萬民留葬邑人瞿式鼎捨宅為祠在慧日寺西

吳景道 廣寧人隸正黃旗漢軍太宗時以諸生考擢吏部啟心郎督察院理事官疏劾刑部理事官郎位受賕不法狀鞫實黜郎位為民順治二年授河東布政使尋擢巡撫時河北初定河南五府餘寇未靖景道檄總兵高第等勦宗養氣於寶豐陳蛟於新野

黃景運於商城並捕斬之四年鄖陽賊王光泰犯浙川遣總兵張應祥等擊卻之五年遣都司朱國強等勦羅山賊張其倫破其鷄籠山寨執其倫伏誅是年山東曹縣賊范慎行踞黃河北岸剽掠開封歸德諸屬邑復檄高第勦之賊敗走長垣蘭陽退據曹縣乃簡精騎分道出胙城東明張左右翼合擊覆其巢殲其衆數千遂縛慎行梟諸市以功加兵部右侍郎七年晉尚書八年陝西商州賊何柴山犯盛氏遣張應祥撲滅之境内悉安十年以老病致仕特恩加一級廕子入監十三年卒年七十有五賜祭葬贈太子太保諡懿僖祀河南名宦

線縉

廣寧人隸正黃旗漢軍順治二年守山東曹州時定鼎之

初流寇餘毒未泯縉治尚簡易勸開荒地歲不下數千頃無力之家助以牛種民始得耕嚴飭保甲諭令守望有助後土賊竊發隣境杌榘而曹獨護安調守河南汝寧時值亂後郡無太守者數年初下車城中居民不滿數十家縉省刑薄賦與民更始有安堵之樂累遷司道並有能聲四年擢偏沅巡撫五年偽貴溪王朱常澆等勾連苗賊分寇沅州縉同線安國等會兵進勦攻下永寧獲常澆及諸賊渠斬之在任三年緣事落職尋卒曹人思其功德崇祀名宦祠

閻璋 廣寧人隸正黃旗漢軍康熙中知湖廣靖州州境利弊璋革重耗禁派累創義學勸課農桑民漸樂業土寇吳旦先犯境身

先陷陣擊斬無算寇遁去復追殲之合治懷其德

于時躍 廣寧人隸正白旗漢軍順治二年任江南合肥令遷河

南懷慶守擢分守河南道勦土賊劉芳等平之八年任陝西按察

使聽斷平允案無積牘一時有于不落店之謠駐防兵擾民時躍

一繩以法馭吏尤嚴所屬無敢受賕者十年巡撫廣西時李定國

等擁朱由榔尚盤據雲貴朱盛濃等應之時躍至斬賊無算陣擒

盛濃十四年孫可望降定國竄入雲南南寧太平等六郡尚為賊

黨所據時躍籌兵畫餉親督師進勦六郡以平十八年擢廣西總

督偽德陽王朱至濬竄入安南時躍遣使招撫至濬等投誠加都

察院右都御史康熙二年卒於官賜祭葬如例祀廣西名宦

遲日巽 廣寧人隸正白旗漢軍順治七年知山西解州之夏縣時叛鎮姜瓖餘孽猶潛伏山林日巽募練鄉勇躬往督戰悉就撲滅脅從者赦之俾得復業又力請蠲積逋減役省徭夏人始蘇

遲維坤 廣寧人隸正白旗漢軍康熙十九年知山東聊城縣寬嚴皆中節公暇即詣隴畝勸民力作兼諮訪時事長幼皆得盡言故所興革皆切中利弊闔邑大治尋卒於官祀名宦

羅文瑜 隸正白旗漢軍世居廣寧順治乙未進士授山東曹縣令弱冠蒞任即能發奸摘伏奸宄潛踪待士和而有禮御下寬而不縱時丈量官地立法詳密弊清而人不擾尋擢濟南守卒祀曹縣名宦

羅文現 隸正白旗漢軍世居廣寧康熙三十五年擢汝南道勵士習勸耕農招墾荒地飭嚴保甲盜息民安聽訟詳慎鋤強除暴每冬月捐俸施粥全活無算崇祠名宦

高國相 廣寧人隸鑲白旗漢軍父中選明乞休遊擊天聰八年國相隨父來歸初任佐領崇德八年從克中後所前屯衛順治元年隨入關二年西征至陝西克延安追流寇至湖廣並有功六年隨征山西叛鎮姜瓖克大同朔汾等處累加世職一等輕車都尉十二年征海賊鄭成功有功十六年駐防京口康熙十三年吳三桂等叛隨征江南徽州等處賊寇屢有功又破吳三桂叛衆於武崗州楓木嶺等處十九年任杭州副都統致仕卒賜祭葬

李棲鳳 廣寧人隸鑲紅旗漢軍為諸生時即以天下為己任天聰時任內院副理事官崇德元年考察各官棲鳳列二等順治二年補山東東昌道旋調湖廣荆南道三年授湖廣布政使旋任安徽巡撫勦休寧婺源二縣土賊及宿松賊趙正等平之六年以僉都御史撫粵與平南王尚可喜靖南王耿繼茂先定南韶二郡揚帆直下遂定雷廉等處八年敗李定國于龍頂岡殲馘無算棲鳳撫粵八年杜請託絕饋遺省刑薄歛勞來安集粵民賴之十五年加兵部尚書代李率秦總督兩粵擒朱由榔偽將陳奇策等定太平思恩等府宣慰烏蠻土司及交趾諸部悉覲服來貢十七年加太子少保十八年設廣東西兩總督棲鳳改廣東尋予告歸卒於

家粵人思之祀名宦賜祭葬如例

王登魁 廣寧人隸鑲紅旗漢軍康熙二十八年知河南汝州值秦晉歲飢疫癘盛行飛蝗蔽天飢民流入中州登魁率衆捕蝗開倉賑貸全活甚衆先是魯山賊王二等倡亂揭竿嘯聚登魁率民兵殲其渠餘黨悉平三十一年運楚米賑關中運員經理不善所至騷動登魁措置有方民無擾累其聽訟果敏胥吏不敢稍有欺隱嗣以薦舉去部民遮道攀留沒後猶思其澤四十九年入祀河南名宦

張朝璘 隸正藍旗漢軍父士彥明廣寧守備為巡撫王化貞中軍化貞遁入關士彥來降授三等輕車都尉朝璘襲職崇德七年

以佐領從攻登州八年從克中後所前屯衛二城晉世職為二等
任兵部理事官順治二年從豫親王多鐸下江南攻克揚州城駐
防蘇州擊敗明總兵黃蜚等軍蜚復擁千艘來犯朝璘以舟師迎
戰春申浦大敗之四年從恭順王孔有德征明桂王朱由榔于武
岡乘夜疾進遇明將曹志建軍擲火毯焚其營志建軍潰復敗偽
國公劉承允于夕陽橋承允乃以武岡降由榔走靖州朝璘轉戰
黔陽破偽伯張元璧所部五營進克沅州六年從睿親王多爾袞
討叛鎮姜瓖於大同復渾源左衛及朔州汾州太谷等城歷官副
都統晉爵至一等男累遷戶部侍郎尋奉命巡撫江西時南昌瑞
州二府經金聲桓之亂戶口凋耗田多荒落巡按御史筮重光請

蠲賦興甿下朝璘議具言二府荒田六十餘萬畝自招墾以來新甿雲集成熟者四十萬未墾者尚二十餘萬若一概徵科必將以荒田之賦飛寄熟田新甿苦賦重勢且委之他徙則不特荒者終荒漸至熟者亦荒應如重光言蠲之便得旨報可十四年加兵部尚書十八年擢江西總督康熙二年右布政使王庭請減南昌府屬賦額復下朝璘議朝璘博考江西諸府縣志知南昌袁瑞三府橫徵之弊自陳友諒始友諒以武寧乃其鄉縣故縣賦獨如宋元舊額而他皆倍之明沿其弊未革前撫臣蔡士英按臣吳贊元欲革其弊而是時府縣新定舊志散亡僅據右布政使莊應會所得故牘奏減袁瑞二府賦額未及南昌今庭請減之誠恤民至計疏

入遂減六縣一州歲徵銀十九萬五千餘兩米十四萬九千餘石
民甚德之四年裁江西總督乃還京五年復出為福建總督六年
以老疾致仕越十餘年卒子聖鐸襲職

張朝珍 廣寧人隸正藍旗漢軍初任工部啟心郎順治十八年
巡撫安徽凡所陳奏皆切中利弊康熙十二年任湖北巡撫時大
軍進勦滇黔軍務旁午朝珍不遑飲食造戰船以練水師建浮橋
以渡兵馬運糧抵蜀不派民夫歲饑捐賑全活甚衆在楚數年招
流亡安舊業絕饋遺焚火耗政有實惠嗣以勞瘁卒於官祀湖南
名宦

張朝瑞 廣寧人隸正藍旗漢軍順治五年知河南登封今年少

英毅洞悉民隱邑經兵燹土曠民稀招來流亡多方勸墾凋殘頓蘇以循能擢御史巡按湖北瀕行父老追送百餘里蒞楚後清節益著屬吏皆敬憚之

秦世楨 順治八年巡按江南疏言臣自淮陽至蘇州察知蠹役害民有勘鞫得實者嚴治其罪而揚州蠹役聚黨百五十人牽牲盟誓欲并力合攻訴告之人臣已執為首者數人繫獄待訊因思懲積蠹於事後不若立法使不為蠹請勅督撫司道及府廳州縣毋於經制外濫設胥役一人並定以年限勿容久充上是其言如所請時兵燹之後田畝界址多混淆官為勘丈吏每緣以為姦世楨令里長造魚鱗冊新舊互核使業戶自相丈量羸縮胥復其舊

並區別其荒坍先是州縣徵賦民有輸納逾額者世楨限夏稅五月秋糧九月先給易知由單示以科則定數乃開徵又每甲彙列賦額及輸戶為滾單使里長按戶遠傳既輸則填註之違則送縣追比以省追呼三者皆先行之蘇州人以為便遂條列以聞通行諸郡又以徵銀設櫃之制有司奉行不實請增司府印封日收簿以鈐司府印輸戶自封投櫃驗數書之簿別於印單執之將啟櫃封櫃先申牒院司候稽核復請革檢點糧長民兌漕運之例改為官收官兌疏並下部議著為令十一年授浙江巡撫時海賊鄭成功侵踞福建窺伺浙江世楨條例移兵防守增造戰艦精選水師諸要務又以沿海魚船容匿賊匪宜以實稽核請籍其名姓按保

甲法以二十五船為一隊責成鎮道稽察無事聽其採捕有事則助守禦疏並議行十二年護理浙閩總督後卒於家

王興禹 廣寧人康熙元年通判湖廣常德置義塚廣賑濟居官廉正及權知府事時山寇剽掠城邑為墟興禹一意招集贖回被擄子女驅逐悍卒諸所徵發不事追呼胥吏作奸必置之法威惠並著

于成龍 字振甲鑲紅旗人康熙七年由廕生任樂亭令首嚴苛派歲饑請賑實惠均沾繕城垣除積弊政通事舉以署灤篆註誤士民請留十年復任由是修學宮勸開墾禮賢愛士緝盜安民十八年陞北通州知州以于靖端薦遷江寧知府擢江南巡察使二

十四年陞授直隸巡撫如改徵狐皮折色停止灰車協運革除芝
蔴花絨雜派善政不可枚舉所薦彭鵬邵嗣堯後皆歷官清要政
聲懋著世以成龍有知人之明歷河道總督加兵部尚書兼左都
御史卒謚襄勤

張震字雨辰城內人舉人家貧嗜學刻苦自勵其學以經史
為本帖括規撫名家不肯逐喧闐以從時好弱冠後入泮食餼嗣
由拔貢考充覺羅漢教習任滿遷直隸唐縣教諭至則講經史明
禮義學士負笈來遊者廡舍為滿乃為之廣校舍以宏教澤士風
翕然丕變去後邑紳上其事請入名宦祠焉道光乙未中北闈第
八名舉人一上春官不第遂絕意仕進省垣官紳聘主講潘陽萃

升書院訓士以敦品節求實學為要旨一時學風蒸蒸日上名流
碩彥多出其門其平生操履清高不謁權貴任山長十五年長吏
之門未嘗通一刺遺躅芳型至今猶嘖嘖人口焉卒年七旬有六
陸鴻遵 字翊周清咸豐辛亥舉人城南陸家窩堡人敦品節工
文章當時學子業帖括者率皆撫拾陳言空泛蕪雜不知探討典
籍發明聖賢之精理先生獨枕經肱史博涉子集務為根底之學
發為文章華時並茂並留心於經世之學設帳授徒一時名士如
劉孝廉春煊孫明經名耀皆出其門後督學使者延公茂欽其學
行聘主講奉天萃升書院受其教澤登賢書捷南宮者難僂指數
旋以截取就知縣歷任直隸肥鄉沙河等縣所至有聲嘗有鉅盜

為害甚劇先生親往督捕卒就獲伏法後致仕卒於家

楊景和 字育庵同治癸酉科拔貢志趣清高不忘取與銘安署

吉林將軍時曾羅致幕府歷充稅務墾務諸要差一塵不染及銘公被議幕府諸人半掛彈章獨先生不與士論高之時有賣菜傭以百金為壽欲乞先生誌墓先生曰吾豈肯以阿堵物為守財虜作譽墓文耶卒謝之其狷介如此浙江督學使者某曾延入幕中襄校試卷所取皆知名士終以不仕卒於家

劉春煊 字東閣號丹厓癸酉拔貢生壬午舉人讀書獨觀大義覃心於經世之學凡輿地兵事農田水利以迄器藝之微無不精究其蘊不屑屑於詞章考據崇文山軍帥督奉以新民廳柳河當

遼瀋之衝入夏汜濫無定流大為民病議濬修左忠壯公寶貴與
君夙契薦君獨任其事隄堰至今尚完固甲午之役裕壽山軍帥
命左公東征左徂於黑城子勦賊之勝意甚銳以為日軍不足平
也君則謂國無小勝不可恃以臨事而懼相規弗納君知事不可
為乃辭歸不為助左公卒死於平壤之戰當是時君盡室遷於醫
巫閭山之木葉山莊率諸子精究礮術試演測量兼製無烟火藥
日蒐討防海籌邊諸事每談及世變日極人材就衰輒為長喟丙
申春魯撫李秉衡以精究天文輿地薦君於朝君默觀世變不出
山依堯山軍帥聘修冷家口子河以胡喜志率兵供役功竣擬決
口居民咸以為不便決後水勢大殺民稱頌至今不衰庚子拳匪

肇亂俄軍入境增瑞堂軍帥避地義州賊猖獗不可制提學陳孫
石專差趣君出山撫賊君開誠布公悍者立置之法遠左右賊有
所束民無大擾皆招撫之效也會和議成省城謀立學堂軍帥延
君總教習而以撫賊事委之新民同知廖錢如至甲辰日俄開釁
君歸山益杜門不出趙次山軍帥力圖新政凡紳耆之以利弊陳
者無不採納君擬濬河策數千言會勸學所委員陳守愚至縣索
觀至再乃與之陳上之軍帥軍帥偉其議命葉揆初校閱將實行
之以款鉅中輟君至省李泂聞其事固請君繪河圖夜寒襲足疾
作自知不起猶仿遊仙體作七絕五首悼遇愴時詞旨悽麗擲筆
而逝讀其詩者皆以君蘊匡時之學而未展其用為可惜然其生

平事功固不可沒也大抵古今講學皆不能無所於偏惟以其能救時者為適用自宋明高談性理偏於自治其弊士大夫無對外思想而人材愈弱惟胡安定立經義治事二齋以教諸生而成材多切時用逮明季博野顏習齋先生起謂格物即周官之三物而側重於六藝其立說與泰西近日學術脗合一時學者多挽強習射有武士風君則謂孔門教育道藝並重非後世飾空言鮮事功者可託以故君之學不規規於講學著書而一以實用為歸宿其窮究器數較之博野尤為精密蓋顏先生後一人而已君卒後軍帥復命蘭季華濬馬廠諸河功迄不成卒延君長子繼荃主測量一遵君遺意始歲事雖秋雨彌旬亦無氾濫所著器藝各稿甚夥

悉藏於家可知者有慎思明辨齋詩若干卷

唐維藩 字介仁城南閭陽驛人天性孝友博學能文弱冠後入

泮清同治甲戌補盛京戶部筆政供職省垣公餘之暇研究政治
載籍頗有心得光緒紀元崇文勤公督奉慨時政之多失條陳利
弊數十事文勤公深為嘉納遂傳見垂詢政事良久擬委以要差
先生辭不就其出處不苟如此一時劉東閣房仲南諸名士無不
與之締交詩酒聯歡探討經史學術由是益進光緒壬辰歲大饑
閭鎮尤甚先生首倡請賑之舉得邀允准桑梓賴以全活者甚衆
羣情感激公送見義勇為匾額一方綜其生平學行洵為一時不
可多得之人卒未獲大用一展其抱負人多惜之

李國英 字伯豪閬陽驛人生負異稟勇力過人善武術於舞刀
奪槊勾卒羸越之法靡不精通家酷貧嘗傭為武童秣馬或勸之
曰以君之材取青紫當如拾芥耳國英乃應童子試遂補武庠生
逾歲秋闈連捷翌年春闈報罷註籍兵部以提塘分省補用未幾
分發江蘇初任淮陽衛千總繼轉建陽衛在官十餘年除莠安良
政聲卓著嗣以年老致仕居家時好行慈善事業父老至今猶樂
道之

民國

陳錫武 字文閣邑東南五糧甸人性沉默崇信義貌溫厚而膽
勇過人幼嘗傭耕聞有盜警輒不平謂勦捕者皆無能若吾當之

必不令猖獗乃爾聞者竊笑之而不知其有大志也光緒甲午中東構兵後糾同志投武衛軍習武事庚子拳匪亂崔苻滿地公退伍捍鄉里亂甫平投奉字右軍以功擢康平總巡屢破巨盜旋升奉天副右路左營管帶民國建元勦扎振兩旗叛匪捷報一日數至升本軍幫統二年勦經棚林西叛蒙三年勦臨通海柳黃泥河股匪六年勦熱區餘匪蒙疆底定升二十九師五十八旅旅長自是歷充參戰軍二旅察哈爾一旅奉軍補充二旅旅長十一年鎮守察東授陸軍中將身經百戰積勞成疾養疴家山無心問世會黑龍匪熾吳督興權素知公能默授機宜公感知遇力疾就道勦撫兼施曉以大義匪聞公至羣相慶曰老陳素不欺人吾輩仍前

抗拒將無出頭之日矣遂相率請降其信義足以服人如此旋以舊疾作卒於差次卒後降者復譁變蓋無公則他人不能制尤足見其威信也生子二長兆麟次瑞麟皆溫厚有乃父風

關文波 字漢章邑北四方台人以殺人避仇於閭陽驛遂家焉游俠好義喜雪不平庚子歲俄兵入境有緡譯某勢張甚莫敢誰何偶與文波齟齬遂手刃之人心大快初為閭陽驛巡官繼擢溝幫子區官溝鎮為京奉營榆之總匯五方雜處號稱難治文波至措置裕如辛亥冬革命軍起奸民所在騷動人心皇皇不可終日時文波由城回防路聞亂民嘯聚起事即率警兵四五人前往勦捕斃一人擒四人餘衆鼠竄民賴以安監督曹樹嘉以駐境陸軍

洶洶欲變調各路巡警赴城以資坐鎮文波聞命立往與其營長于某侃侃立談曉以禍福利害一軍警服全境晏然無何馮閣臣中將編師以文波材武拔為營長從征蒙匪蒙匪出沒無常莫可蹤迹文波冒險窮追屢奏奇功遂擢升團長授陸軍上校民國六年改充暫編第二旅六團團長駐防省垣七年四月以兩湖甫定伏莽縱橫調往長沙八年七月又調回順德旅部駐石家莊九年冬文波由旅部回防在汽車上被馬弁里東閣擊中要害而亡弁亦逸去來歛飲刃岑彭受創良可痛也平日延禮士大夫恂恂儒雅懽若平生至其治軍則異常嚴厲昔昭烈誠桓侯曰卿好鞭打健兒而復令在左右此取禍之道也文波之被刺其殆蹈桓侯之

覆轍乎

鄉宦

清

年遐齡 羹堯父由筆帖式授兵部主事歷任至湖廣巡撫

年羹堯 字亮工由翰林庶吉士歷仕至四川總督嗣以平西藏

郭羅克青海等部落論功封一等公爵尋議罪詔諭獄中自裁

年希堯 羹堯兄自筆帖式累擢工部侍郎仕至江蘇巡撫

許如龍 城東土堡子人附貢生乾隆時曾任廣東肇慶府封川

縣知縣

顧恒基 土堡子人由筆帖式仕至盛京戶部郎中

汪洪淵 山岩口人內務府漢軍旗人仕至河南道

汪永聲 字和齋山岩口人內務府漢軍旗人乙酉科舉人曾充
盛京筆帖式

趙成善 字寶岩漢軍旗人以進士起家歷任安徽鳳陽府知府
署蕪湖道長子錫蕃任廣西平樂府知府卒於官次子錫桐任陝
西布政使民國改元辭職

宋連仲 字月卿滿洲人世居正安堡光緒乙卯科舉人曾任光
祿寺署丞法部主事民國改元歸里

唱維霖 城南閭陽驛人歷任直隸鄂爾土板張家營郭家屯巡
檢

唱維翰 城南閭陽驛人歷任吉林農縣巡檢伊通州吏目

王廷俊 字泮堂城北鎮邊堡人漢教習歷任昌圖府教授康平縣廣寧縣訓導

佟喜亭 字暢元城內人曾任陝西西安府知府

蕭雨潤 字慰三歷任山東省鄆城平原曲阜等縣知縣

陳寶書 字叙九城內人光緒丁酉科舉人揀發廣西知縣

蕭雨春 字沛三城內人光緒辛卯科舉人山東試用知縣歷任

奉天復州義州學正直隸成安縣訓導

艾向榮 字欣然城內人恩貢生補用直隸州州判

唱錫綸 字式如維翰次子曾任直隸巡檢

楊振聲 字華國城內人曾任熱河郭家屯巡檢署理平泉州知

州

李景賢 字尊一 城內人 曾任直隸沙河驛巡檢

民國

王鏡震 字明宇 城內人 曾任奉天政務廳長

李維楨 字子棟 城東中安鎮人 光緒戊戌科進士 吉林候補知

府現充督軍署秘書

趙崇凱 字振平 城內人 由盛京戶部員外郎改補直隸知府

楊乃賡 字子襄 縣城南關人 光緒丁酉科拔貢 戊戌科舉人 曾

充內務部僉事

吳慶霖 字閣忱 城內人 奉天法政專門學校畢業 曾充熱河都

統公署審判處處長

蕭露華 字渥均城西蘇蘇堡人日本早稻田大學畢業法科舉人現任吉林省地方檢察廳廳長

吳殿章 字撰卿城內人奉天法政專門學校畢業曾任遼陽縣知事

李學詩 字序堂城東窟窿台人曾任巴顏通河等縣知事

李雨春 字子丹城東二十里堡人北洋法政專門學校畢業曾任鳳城縣知事

郭眷周 字蔚文城東何屯人北京明德大學畢業曾任洮南縣知事

奉天省大鎮縣志 卷三
馬書麟 字趾仁城內人奉天法政專門學校畢業曾任熱河平
泉縣知事

劉少卿 字拂塵城內人曾任河南武安縣知事

李奠唐 字子休城東李三家子人曾任熱河灤平縣知事

王書麟 字銘閣現任直隸赤城縣知事

李子厚 字乾齋城內人北京國立大學畢業曾任遼中縣知事

陶中福 字箕五城北四方台人光緒乙丑恩科舉人由盛京刑

部主事改補廣西知縣

李恩溥 字惠九城內人吉林補用縣知事

劉慶齡 字夢九城內人宣統己酉科拔貢補用直隸直隸州州判

陶奎仁 字炳南城北四方台人曾充北鎮縣稅捐徵收局局長
馮雲峰 字暢元城東中安堡人曾充熱河阜新縣稅捐徵收局局長

蕭光瑀 字子卿城內人曾任直隸良鄉縣縣丞

孟慶陞 字品一城南孟家窩堡人前清附生曾充奉天北關模範小學校長保薦任職歷充吉林省公署科長

蕭露濃 字本之軍需學校畢業曾充兵工場科長現充殺虎口稅捐總辦

孫樹棠 字蔭南前清附生考職典史

宋景和 字暢齋前清附生考職巡檢嗣歷充陸軍書記官保薦

孝義

明

李用 廣寧生員弘治間母張氏卒既奠廬於墓側晨昏哭奠事

聞旌表

吳裕 廣寧人少孤母王氏教育備至比長遊庠除貢禮部會母疾衣不解帶藥必先嘗母卒時裕哀毀慘悴既殯結廬墓側晨昏哭奠三年如一日仕至和州判官年八十餘卒於家

紀刺漢 廣寧人五歲喪母及長父聰病篤思肉乃割股煎湯以進父遂愈六載始故廬墓三年撫臣書孝行匾於門

葉洪 廣寧人幼孤依母度日嘉靖間母病思食肉麪餅不能辦

乃傭於人得麩一斤又苦無肉遂剗股肉以進母病即愈

史璠 廣寧衛人天性和平樂聽善言母病朝夕侍立病篤益勤苦夜不就枕及母卒行古喪禮倚廬中門絕酒肉遠帷薄三年不出給事中賀欽作倚廬記表之

程錡 廣寧衛人太學生母病日侍湯藥夜不解衣母轉病痢錡聞醫者言糞甘滑者不治錡嘗之果甘悲號幾死母旋卒值鄰家失火風急勢迫錡撫棺號曰萬一不虞與母俱焚耳忽焉風反火滅人以為孝感所致

趙堂 廣寧人父母先後俱病甚堂剗股進食病咸愈

清

夏廷印 官神木副使以清恪聞順治五年高有才之變慷慨赴難死於府谷贈太僕寺卿

王之儀 字虞廷順治七年知寧鄉縣時姜逆初平之儀招徠逋亡且為規畫生計民稍復業嘗暴雨水漲毀城垣十丈有奇之儀立淋潦中督衆完築城獲不圯水退築護城堤於外植柳其上人皆便之尋遷海寧州陞知福州府耿逆之難罵賊死贈大僕寺卿祀九忠祠

蔡廷琰 初以拔貢任兗州府學訓導順治四年署張秋浦河通判禽土寇丁惟嶽論功陞曹縣教諭及李化鯨陷城廷琰力戰死之

李金玉 閩陽驛人祖國英曾任江南提塘金玉幼習拳術喜與人鬪無敢勸阻者惟天性至孝母呼之輒止有僕曰李忠亦強武絕倫本鎮佐領扎公以時局不靖倡辦鄉團以金玉參贊軍事有劇賊徐占一等糾衆千餘環攻閩鎮金玉隨扎公晝夜抵禦殺賊無算無何火四起鄉團悉烏獸散金玉見大勢已去與李忠奉其母以逃車行至河南忽來數賊攔輿君與李忠欲前格拒其母止之遂束手受擒賊擁金玉至三官廟前將斃之李忠泣請以身代賊以仇視鄉團終弗許主僕遂同遇害時同治四年冬月也後扎公上其事贈雲騎尉世職

宋錫齡 字鶴亭滿州鑲紅旗邑東北正安堡人清咸豐年間充

盛京工部筆帖式勤慎從公迄無弛廢素為長官所嘉許父歿喪葬盡禮尋因母患目疾去官就養澹然無仕進意母卒哀毀異常廬墓者三年妻亡子病皆置弗聞邑紳上其事奉旨旌表賞銀建坊於里門甲子自省旋里途遇巨匪數十人將貲裝剽掠一空及詢知姓名皆云君乃孝子吾儕小人何可侵犯遂舉所掠者盡返之其行誼之感人如此尤精星學繪事偶一拈毫尺幅片箋人爭珍藏之

王廷列 字榮先邑西北大市堡子人幼業儒屢應童子試未售旋投縣署禮房充書班未幾補經丞恂恂仁恕力戒貪黷期滿歸家依然寒素居母喪哀毀盡禮既葬廬墓三年有司稟請大憲奏

聞奉旨旌表賞銀建坊焉

閻鵬程 字凌閣城內人副貢生文江之子也少承家學弱冠後

蜚聲黌序性純孝父病卧起扶持痛癢抑搔徹夜宵衣不解帶者
數月醫治未痊遂暗禱於神刲股肉和藥以進父病霍然大愈人
以為至誠所感云

民國

高慶武 字占一邑西南衛屯人幼有至性篤於孝友母早卒繼
母撫如己出慶武亦孝敬維謹嗣母以積勞致疾醫藥罔效慶武
益徬徨無措因思古人有剷身救親者乃密封肱肉託鄰媪作蒸
食以進母疾果愈面瘦削黯無人色或謂刲肱時創劇所致卒早

天無嗣

王丙炎

字乾符城南興勝屯人性愿欸造次不能以言自達事

親色養人無間言父歿寢苦枕塊不飲酒不食肉母歿亦如之宣

統改元舉充孝廉方正一時以為得人其待宗族交游尤敦古處

堂弟體仁病革君親往候之弟伏枕泣曰病已至此夫復何言惟

債臺高築勢將破產死何足問恨事未了耳丙炎曰弟毋然宜善

自調攝此小事當為若了之乃出銀幣八千償其宿債其優待昆

季類如此當清末自治會開辦之初建築經費苦於無著丙炎首

捐鉅款千元閭陽驛兩等小學無固定校舍又慨捐五千元購置

校舍年逾古稀精神強健蓋天假遐齡其享年正未可量也

張兆椿 字長榮世居邑北市堡子兄弟四人兆椿居長父早卒
母晚年邁瘋痺之疾委頓床褥兆椿常左右之自起居飲食以至
溲便皆躬自扶持母性褊急稍有違拂輒以掌摑之兆椿每先意
承志得其歡心春秋佳日兆椿恒負母出遊以資頤養或欲詣戚
族燕會亦如之雖卧病數年而慈顏怡悅無異平時洎母卒喪葬
盡禮人咸以孝子稱之語云久病床前無孝子况十餘年之久乎
嗚呼難已

萬融和 字春暄城內人文庠生國和之弟也少業儒後棄帖括
學經營商業性純篤事親以孝聞母病稱藥量水晝夜不離側乃
多方醫治久未見愈融和焦急無策乃思古人有剗肉和藥愈親

者遂屏去家人暗割臂肉入藥煎之母服後果痊愈聞者咸以為至誠所感云

文學

王廷佐 字翰屏邑南常新店人品端學粹經術湛深教授鄉閭以明經老動遵禮法有儒者氣象及門之士如陸孝廉鴻遵艾明經向榮皆其高足弟子時有侮先生者勢將興訟門人代為捉刀稿初脫先生視之曰得毋近於作偽乎若是吾不忍為也其人聞之卒造門請罪其至誠感人類此嘗自作門聯云室家安樂窩依邵園圃游優徑步陶以安樂靖節兩先生自况其志趣之清高概可知矣

張德全 字守愚城北破台子人歲貢生淡泊自甘隱居教授從游之士率多騰達以去如宋錫齡孝廉其特出者也先生閉戶著

書不問世事曾見有先生手錄歷代帝王總紀四冊上起盤古下
訖明末三代及秦有記錄而無論斷自漢而下則提要鉤元議論
風生約而不遺簡而不煩雖較之全史百不存一然大綱固已畧
備矣遺稿尚存惜無人刊而行之

杜奎閣 佚其名奎閣其字也城內人歲貢生博通經史其學以
六經為根柢先賢傳註無不熟爛胸中餘如諸子百家俱瀏覽而
探討之故發為文章制義而外凡詩古文辭兼擅其長為一邑名
宿至今人猶稱之

劉玉田 字潤之恩貢生城東高山子村人村故廣寧轄境先生
天性渾厚不修邊幅讀書務究極其理往往自抒心得能補前賢

傳註之所不及敦品節工文章凡古文古體詩以及帖括之學無不獨闢蹊徑一脫依傍剽竊之陋習弱冠後受知於學使汪公鳳翽每試必拔列前茅許為國器然文章憎命屢躋秋闈後設帳授徒循循善誘一時英俊多出其門晚年部選訓導未就仍與弟子讀書談道所著有明季稗史十六種書後又著有毛詩正誤若干卷藏於家

魯紹周 字振岐歲貢生為人剛正不阿工制義詞氣充沛設帳半生成材甚衆未仕卒

蕭雨霖 字月三城內人附貢生少聰穎讀書寓目不忘者宿皆驚異以家貧無力就學為童子師以資事畜課餘之暇益肆力於

五經四書久之學益進遂補博士弟子屢赴秋闈不第乃絕意上
進以教授老門墻澹靜履動平實鄉黨後進靡不環集聽講一時
隽才皆騰達以去如陶申福楊乃賡等悉登賢書劉慶齡以選拔
顯其餘游庠食餼者更僕難終弟雨春由入泮至領鄉薦飲食教
誨皆先生一人之力至今猶嘖嘖人口焉春秋五十有八卒於家
蕭雨春 字沛三月三之弟也天性孝友事兄尤謹善書法工文
章牖啟後學殷殷不倦設帳十數年被其陶成者頗多後歷任復
州學正直隸成安訓導等職所至栽培後進成績甚著所著有歷
史揭要忠孝節義錄等書行於世

王殿甲 字子輝城西南楊屯人附貢生開門授徒成就者日衆

如王明經丙炎邱茂才有壬皆其入室弟子性豁達不拘小節談忠孝節義事則激昂慷慨如見其人於諸子百家無不泛觀博覽而象緯一門尤具卓識嘗曰俗謂橫者三星豎者三星為參非也蓋參共七星橫者三星為參之中其上下遥遥相對者尚有四星豎者三星乃伐星耳俗謂橫者三星豎者三星為辰亦非也蓋橫者三星即心宿豎者實四星即房宿俗誤合二宿為辰爾或難之曰私習天文懸為厲禁先生何由知之先生笑曰吾昔館於江家台王氏別墅有一奇宿人山東籍春夏種瓜秋冬守舍一夕散步庭中月白風清星河皎潔其人忽曰天將大雪盍抱薪以備不虞衆共嗤之已而果雪因問其何以預知曰某曾充差於欽天監雖

曉天文特一知半解耳且出手繪天圖一幅以是知之厥後孟憲
彭於三垣二十八宿畧窺門徑且輯井觀叢錄一書皆先生啟之
也

孟贊堯 字希廉世居邑南孟家窩堡累代書香至先生始以縣
案游庠聲名藉甚與孫明經名耀劉孝廉春娘以文章道義相切
劇聚徒講學從游之士自遠而至戶外屢常滿堂弟昭然家赤貧
年逾弱冠後欲就學先生嘉其志不索修金堂姪憲武家居授徒
朝夕就正獲益良深厥後均補博士弟子其體卹寒峻類此先生
嘗謂讀書期於明理明理期於致用若徒攻浮文以資進取抑末
也家學淵源鬱而必發子弟列膠庠者甲於南鄉皆先生之力也

佟世雲 字紹唐城東佟屯人邃於經史故發而為文奧博湛深
俯視一世驅遣史事如數家珍於九章算術尤有心得其誨人也
懇勤周至惟恐弗喻從游之士一時稱盛如李秘書維楨闕都統
朝璽其尤著者也屢膺鄉薦卒未獲售士林惜之宣統改元舉充
孝廉方正論者以為無愧焉厯充北鎮縣縣立第一小學校長兼
教育會正會長嗣以積勞致疾不永其年同人開會追悼稱為學
界泰斗良不誣也性恬退視功名富貴泊如也平日手不釋卷每
讀至午夜輒以濁酒下之因此遂致痼疾嘗賦感時詩云盼到國
民程度進黃梁夢醒禍臨頭身處草莽日抱杞憂固未嘗須臾忘
天下也

徐芳桂字範山歲貢生邑東沈家屯人員才氣雖數代書香然少孤未能親承父教訓蒙自給課餘則力學不倦經史子集靡不博覽數奇屢困秋闈不第以舌耕終其身旁涉岐黃頗具灼見

蕭懷錦

字煥章先生世居昌黎縣馬驛坨後遷廣寧蕭家嶺世

業儒父大賓廩繕生行誼為士林所重懷錦性豪爽以鯁直稱幼幼於學尤喜聚書清光緒十三年補博士弟子員以輓近士子不學古而蘄倖獲思矯其弊故其訓子也課之以王輔嗣周易畧例繼以爾雅必責其成誦為文章必原本經術學者多崇仰之庚子變後趙次山軍帥倡行新政設省學堂延舉人劉春娘榮文祚董其事舉懷錦為講師當是時科場初停學者或迷於趨向懷錦訓

厲諸生以樸學相砥礪所成就多知名士居久之辭歸著北鎮縣
鄉土志二卷既而出就吉林方言學堂監學民國六年任省城國
文專修科講員著有魏晉史漢文講義各種越二年歸北鎮任縣
立師範國文教員作國文擬草一卷十四年復任東北大學經學
教員乃博取漢宋明清諸儒之說而擷其精作鴻範擴誼二卷宋
大章為序而傳之旅長陳錫武欽其品延治軍書乃遊洛陽拜邵
堯夫祠北出張家口既而復就縣幕歷洮南巴彥以歸年已逾七
十矣鬚眉峻偉與人言聲猶震屋瓦晚歲皈心釋典以自怡弟子
關義鐸路夫工為詩李維楨好為辭賦皆永承甄育者也

陶申福 字箕五城內人光緒己丑舉人天資超逸詩才敏捷著

有宦遊隨筆未付梓現充奉天張上將軍西席

馮燦章 字若星本邑人優貢生博學能文善書法尤長於詩賦
歷充直隸遵化縣知事陸軍部秘書長

佟榮麟 字錦文城西白家屯人溫文儒雅工書法尤長於詩賦
郭翰周 字炳文城東何家屯人天資聰敏善書法得顏魯公遺
意詩賦尤佳

張麟閣 字蘭臺城南何家營人優貢生嫻詞賦書法尤佳

鄉耆

吳金鏢 字振鼎城內人性情坦易胸襟豁達與人交無城府生平多善行佃田者每遇歉歲輒免其租不取盈焉由耄耄以至期頤步履不恃鳩杖精神矍鑠玄曾繞膝家庭之內雍熙如也邑紳臚舉其事狀以聞蒙大總統頒給五世同堂匾額卒年一百有二歲其玄孫慶林畢業於奉天法政專門學校曾充熱河審判處處長人咸謂其厥後克昌者皆其積善所致云

張瑞麟 字慶祥城內人天性誠樸事親至孝友于兄弟生平淡於貨利與人無爭出作入息自食其力不事外求門內常有和樂氣象現年一百歲精神矍鑠體質康強邑紳列其孝友事實稟請

地方官轉請蒙省憲核准獎給壽民匾額一方

方伎

艾向榮 字欣然城內人恩貢生工帖括尤好術數凡堪輿醫卜星相諸書無不窺其奧旨人有求其選塋地建宅舍者預言吉凶每多奇中為本邑術數名家

佟一峯 城北四方臺人少業儒後棄帖括學精研堪輿之術而得其要秘一時名譽藉甚

劉繼荃 字紉齋城西二道溝人東閣長子也幼承家學於數理精蘊及宣城梅氏算書精研有得盤山縣創修減河馬明府嘗邀其測量地勢預估工料無不精當河工告成至今利賴之尤長於堪輿之學於疑龍撼龍各經頗能通其奧旨一時形家無不推重

之

李萬春 字香閣邑南甌台人性灑脫喜恢諧有東方曼倩遺風
於醫卜堪輿靡不宣究而測字尤出人意表有以妻病問者書一
合字萬春曰祇賸人一口矣未幾其妻卒有欲詣賊巢者不往恐
失盜歡往又恐陷不測時值十三夜月即書月字以問萬春曰此
行必得圓滿結果謂此後正月光圓滿時也已而亦驗其靈敏類
此年十七餘偶得微疾自知不起凡身後事悉預為料理卒之日
忽問曰日已中乎曰中再撫之已逝矣

蕭露濃 字本之城西赫赫堡人畢業軍需學校性好術學凡壬
遁堪輿諸書無不博覽旁搜研究有得尤精於地理之學一時業

堪輿者多宗仰之

杜宗甫 城內人嫻堪輿卜筮諸術先是其從兄仙洲從江南某術士受形家秘訣宗甫潛心從之學盡得其術於是預卜牛眠吉凶多奇中之

林華增 城西小亮甲山子人林本望族清初由莆田遷居於此家傳故有禁方乃資以自活乾嘉間洪將軍由京赴任路經廣寧站時夫人患舌爛不食不言勢亟危險聞華增善外科召之至華增見舌已爛有難色正躊躇間適侍婢抱小犬經其前乃謂將軍曰公若能舍此犬則夫人之舌可治矣將軍曰如有所需即千金弗惜况區區一犬乎華增乃以利刃取爛舌以犬舌易之敷以禁

藥由是痛漸止飲食亦漸進半月後平復如故將軍悅賞給陞科地二千畝並保以員外郎職銜案林氏家乘云其先出自殷比干之子逃難於長林山因以為姓至唐睦州刺史林披生九子皆官刺史因名十德堂故林氏子孫至今猶沿用之示不忘本也

孟昭謙 字益山邑南黑魚溝人幼穎悟絕倫於三式星命諸書靡不涉獵而尤邃於醫其視病也洞見膏肓能呼肺腑而與之語凡來診視者下至走卒販夫無不立與施治意所不可雖安車往迓弗顧也性伉爽不羈有弗之者弗與較第書一聯以自嘲曰仗義半從流俗輩負心多是讀書人蓋紀實也

王化鵬 字翼雲城內人附生屢試棘園不第遂棄舉子業精研

醫學自靈樞素問以逮歷代醫學名家諸書靡不搜討而獨有心
得立方不拘湯頭因病投劑無不奏效一時聲聞甚著懸壺數十
年活人無算

王化遠 城內人化鵬之弟也少業儒後棄帖括學從事岐黃事
業醫術頗精應京師太醫院考試蒙取吏目之職施方療病每多
奇效醫林咸推重之

王桂輪 字月波城東沙河子村人少業儒弱冠後因父病延醫
未愈遂棄帖括學精研醫術與名醫某風雨聯床析疑辨難幾近
十年乃盡得其術立方療病每多奇效一時名甚著攀請者踵至
凡貧乏無力就醫者輒為施方給藥不取資焉時人多敬仰之

汪成義 城內人精岐黃術施方濟人每多奇中尤精女科

懷唐阿 字文軒清宗室世居賴公堡子性恬靜和易近人尤工

繪事於山水花卉無不入妙嘗寫蛺蝶穿花圖張堂中神采飛動
栩栩如生見者歎為神品其少君及女公子均善繪蓋大有父風
云

曹玉山 城西曹家屯人父松風精繪事畫人物神采奕奕形態
畢肖片紙隻字人爭寶之玉山幼承家學初作畫即驚其長老曰
他日當獨步一時及長學益進有詣之者見其解衣磅礴方揮灑
廣幅間墨瀟淋漓不可以目乃隨筆渲染或煙巒羅列或雲樹迷
離無不妙入論者以為米顛後一人性孤介不妄交游每拄杖獨

往聽石瀑松風樂而忘返殆古之泉石膏肓者歟僅以畫師目之可乎哉

王天恩 字郁周城內人資質慧秀幼好圖畫偶繪花卉翎毛惟妙惟肖及長與美術名家遊術益精進寫生妙筆為一時之冠

李奠唐 字子庥城東李三家人北洋優級師範圖畫專修科畢業天資敏慧幼好圖畫妙筆天然後入學校於炭筆鉛筆水彩等畫不無研究有得精美異常於用器畫一門尤為擅長歷充奉天中等以上學校圖畫教員為東省美術家之巨擘

列女 節婦貞女孝婦烈婦俱附入

遼

甄氏 世宗妃也其先為後唐宮人有姿色帝從太宗南征得之寵遇甚厚生寧五扎穆及即位立為皇后嚴明端重風神閒雅內治有法莫敢干以私劉知遠郭威稱帝世宗承強勝之勢屢南侵后與參帷幄密贊大謀不果用察克作亂景宗立葬后於醫巫閭山

明

賀昇妻楊氏 名妙真年十八適廣寧後屯衛總旗賀昇事舅姑以孝聞昇隨征歿於山海關氏往扶柩歸奠子祥甫三歲撫育成

立孀居四十九年成化間旌表

生員侯爵妻汪氏 廣寧中屯衛總旗汪勝女年十八歸爵夫死家甚貧汪氏賣奩以供殯葬翁姑相繼卒復經營喪葬如禮守節終身正德間旌其門

王清妻曹氏 廣寧人清病卒遺腹六月生男父母欲奪其志曹氏以死自誓親黨憚之不敢言卒撫孤成立家業復興

鄭真女 廣寧人指揮鄭雄之女幼敏慧勤女紅及笄納遼陽孫隸聘未幾隸故女聞訃縞素哭奠誓不更適練衣杜門至親罕見其面既三年父母以隸未奠雁將受他聘女聞而流涕輒不食終日父母知不可奪遂成其志年未及老容瘁齒落卒之前一日羣

鶴飛翔屋上嘉靖十八年旌其門

王福妻臧氏 夫卒臧氏守節自誓事姑高氏以孝聞居數載邑人聞其賢欲娶之知氏不可奪乃謀氏兄私納其聘臧氏向姑泣曰妾以姑缺養故未忍與夫同死今不得侍姑矣遂自縊

臧錢妻孫氏 夫死孫氏教子臧仲學舉於鄉守節二十五年官表其閭

清

劉鳳鳴妻杜氏 年少夫亡撫孤守志子天又撫其孫終身不二
包學聖妻王氏 早孀撫子方長又夫復伴寡媳撫養孤孫人稱

雙節

包一祿妻趙氏 夫亡姑苦楚居夙夜操作矢志不二

黃廷梁妻姜氏 夫歿氏孀居教子盡登黌序

趙起雲妻蕭氏 盛年嫠處婦道母儀俱堪垂則

包毓珍妻秦氏 夫亡奉寡姑育弱媳備歷艱辛冰操不渝

李鳳鳴妻王氏 矢志守貞奉姑盡孝甘旨之奉先意承志始終

不懈 俱於雍正二年旌表

李振英妻李氏 夫卒守貧撫孤衣食維艱貞操不二

李天植妻周氏 守志奉親竭力盡誠孝行與苦節並稱

張星曜妻趙氏 居孀完節奉姑撫子有古賢婦風

閔士英妻王氏 夫歿家貧守節五十餘年壽至八旬

劉起鳳妻齊氏 守節安貧孝姑慈幼力屏紛華心甘淡素 俱於雍正四年旌表

正四年旌表

劉玉科妻沈氏 操凜冰霜心甘荼蘼勤儉之風式乎鄉里 乾隆四年旌表

年旌表

周玉規妻閔氏 苦心守節雖境處饑寒而貞一之操鐵石不磨

乾隆四年旌表

張玉利妻符氏 夫歿孝養舅姑救水承歡力勤紡績以供甘旨

乾隆七年旌表

趙璧妻胡氏 夫亡奉翁姑能曲體情意孝行尤著 於乾隆七年旌表

趙宏智妻張氏 青年失偶茹苦終身年逾垂白清節彌堅

齊君寶妻劉氏

矢凜冰操守節不二閭範整肅舉止皆以禮法

劉開基妻趙氏

早歲孀居零丁辛苦堅持清節之死靡他

李發顯妻張氏

素履懷貞及夫歿永持冰操沒齒不易

王之成妻朱氏

夫亡誓志不移歷四十年貞行無愧

劉進朝妻王氏

夫亡嚙指自誓持守清貞至老如一俱於乾隆十年旌表

何如琳妻王氏

夫亡奉事舅姑撫孤成立成稱完節

符鴻澤妻常氏

守節安貧奉姑紡績故事無懈

趙顯榮妻張氏

夫歿盡典簪珥殯葬盡禮立志堅貞勵節皎潔

李發顯妻崔氏

矢志守節無子繼姪姪亡撫孫成立洵為苦慘

俱於乾隆十八年旌表

朱崔氏 朱家墳朱顯忠之妻也青年守志晚節彌堅於乾隆十八年欽奉旌表並頒給匾額文曰松筠競節

王廷實妻李氏 路遇強暴欲污之氏力拒遂遭慘殺特祀節孝

祠 乾隆三十八年旌表

何王氏 小孤家人少年守孀節孝雙全同治四年奉旨旌表建

坊村外

馮楊氏 馮朝輔之妻也十七歲于歸二十九歲守孀事姑至孝

光緒年間奉旨旌表

李張氏 邑東二十里堡李振東之子婦也十七歲于歸翁豔其

色屢欲調之氏弗從姑復助之為虐氏終弗許由是失翁姑歡動

輒得咎一日氏飲泣夫問其故泣益悲曰妾所欠者惟一死耳蓋以五月五日翁覲室中闐寂惟氏兀坐驟逼之氏奪門走出失聲呼救鄰里咸集始獲免由是氏晝夜憂慮必誓死以自全會晨汲奮身投井中鄉人拯之出始蘇翁姑以氏性烈怨益深謀痛挾之以洩恨一日伺其夫外出扃其戶掖氏而縛之牀箠楚交下最後以一足蹙之氣遂絕母家人至見傷重欲鳴其冤翁姑懼啗以重金事將寢矣適李景祥知縣事刺探得實乃按律問擬復為氏請旌入祀節孝祠

郭陳氏 邑東何家屯處士郭景隆之妻年十九于歸逾歲夫亡僅遺一女氏矢志靡他以夫兄景春之子耀奎為嗣撫如已出讀

書未第以入貲授直隸河間縣北魏村巡檢丁母憂去官清宣統二年奉旨旌表入祀節孝祠

民國

艾符氏 邑南鴨子台人也年十九于歸艾君昶為正室二十一歲守節生子英奇甫八月自夫歿哀毀逾恒屢欲身殉惟以親老子幼制淚撫之孝養翁姑訓子成立民國六年紳耆上其事大總統頒給匾額徽章証書如例

柏張氏 邑紳張公錫齡女也適邑南沙河子村柏林琴瑟甚篤林十八歲夭折氏甫二十守柏舟節無子撫猶子魁芳如己出教養周至事翁姑先意承志以孝聞且和妯娌門內雍雍茹苦含辛

垂五十年如一日問里賢之上書請旌民國六年十月蒙大總統
褒賜節勵松筠匾額壽六旬有三

陳闕氏 前五糧甸陳錦波之母白首全貞大總統賞給節勵松
筠匾額

劉孟氏 問陽驛劉福元之妻也青年守志飲冰茹蘗垂四十年
孝養孀姑訓子成立並捐資興學蒙大總統褒以匾額文曰志潔
行芳壽六十七歲而卒

邱李氏 興勝屯邱振甲之妻也十七歲于歸二十五歲守節以
姪承嗣教育有方於民國六年請准褒揚匾額文曰節勵松筠春
秋七十五卒

呂李氏 邑東土堡子人前清文庠生呂調元之妻黑山武庠生李春林之長姊也年十九于歸事翁姑以孝接娣姒以和閨門之內雍雍如也及夫卒矢志靡他有柏舟之風生子二長希凱肄習英文次希正畢業森林學校民國十四年邑紳欽其行臚舉事實請褒揚如例

單李氏 小亮甲山子人單國政之妻李耀廷之女十九歲于歸四十七歲守孀八十二歲故去生三子長宇文次波文三鴻文於民國十二年二月蒙大總統褒揚節孝匾額文曰宗族稱孝

鄭柏氏 城西鄭屯鄭廣來之妻城南第五區沙河子柏有鵬之長女十九歲于歸二十一歲守節以姪繼賢為嗣於民國二年三

月蒙大總統褒揚節孝匾額文曰節勵松筠

吳尉氏 城南頭台子吳吉瑞之妻本村尉公之女十八歲于歸三十歲守節民國元年十月蒙大總統褒揚節婦匾額文曰柏節松操

袁唐氏 路屯人袁慶盤之妻馬什太堡唐萃然之女十九歲于歸二十九歲守節家境寒微生子二人長如振次如臣該節婦上事孀姑下撫孤兒并白親操歷盡艱苦里黨稱賢人無間言

胡馬氏 大白屯胡玉川之妻邑東莊屯馬公之女十七歲于歸二十七歲守節身無所出過夫弟玉峯之次子為嗣侍奉翁姑和睦妯娌鄰里稱賢

劉劉氏 大柳屯劉柏青之妻小柳屯劉文達之女十七歲于歸
二十六歲守志奉姑至孝姑卒殯殮盡禮於民國四年經紳耆恭
送守義堂匾額以旌之

張張氏 大柳屯張文廣之妻五區大亮甲山子張姓女二十二
歲于歸三十歲守節子二長曰清林次曰清泉撫育成人以次授
室氏教子有方持家有法該屯耆老欽其懿行於民國十二年十
月公送匾額一方文曰節壽齊高

于常氏 聶屯于德明之妻十七歲于歸二十三歲守孀身無所
出翁姑逝世僅遺六歲夫弟該婦撫育成人並能勤儉持家士紳
嘉其節操懿德呈請地方長官轉請褒揚

郭孫氏 邑東何家屯郭興周之妻二十三歲夫亡守節生二女
無子以夫弟郭憲周之子鴻年為嗣四十三歲而卒飲藥茹荼二
十年如一日

郭李氏 邑東何家屯郭文周之妻二十歲于歸二十二夫亡守
節子女均無出以夫堂弟郭則周之子聯英為嗣奉親教子二十
餘年人無間言卒年四十四

楊韓氏 廖屯邑庠生韓錦堂之姑年十八適邑南大吳屯楊作
舟甫四十日而夫亡氏泣竭聲嘶誓以身殉翁姑慰勉之乃止自
是脫簪撤瑱不出閨門孝養翁姑終身無間以堂姪福元為嗣紳
耆上其事蒙大總統題額褒之文曰節勵松筠並給徽章如例

陳陶氏 正白第二旗領催富森布之長女也年二十三適大白
屯陳繼思甫二載而夫亡氏呼天搶地幾不欲生幸孀姑在堂相
依為命光緒三十二年城守尉某以節孝雙全題請旌表洎姑亡
以姪國維為嗣氏上奉孀姑下撫繼子婦道母儀均堪矜式含辛
茹苦垂五十年邑人莫不重之

薄劉氏 邑南姚家窩堡薄永吉之妻也年十七于歸生一子一
女而永吉亡翁姑欲奪其志氏不從屢使人諷之氏泣曰生為薄
氏婦死為薄氏鬼矢靡他也氏善女紅凡男婚女嫁皆一手經營
無何甫抱孫子又歿殂媳改醮以去夫弟永善利其嫁陰使人勸
之曰夫亡守子今子亡媳嫁復誰為乎氏泣曰向之不去者為子

也子雖亡猶有孫在奈之何棄之自是避其夫弟傭於外以鍼黹謀生席棘飴荼垂四十年鄉里莫不重之

孟郭氏 邑西南荒地郭姓女適孟家窩堡孟繼起為繼室撫遺孤如己出初繼起兄弟三人次繼超次繼越已分居各爨父亦自立門戶至是氏謂家人曰翁姑老矣若猶躬自汲爨人其謂我何遂命長子迎以歸凡奉菽水紉衣裳皆氏躬任之家人感化爭以滌廁煖褻衣為榮及翁姑歿喪祭盡禮人無間言子四長廣錫前室生其三皆氏出氏待長子獨厚於諸子洎析爨遂依長子以終廣錫年八十餘常述其事以語人曰阿母非猶夫人之母也言訖潛然淚下其遺愛感人如此厥後孫贊堯始顯宗支繁衍游黌序

者難以枚舉咸以為孝慈之報云

劉鍾氏 閩陽驛師範生鍾秉秀之胞姊適四方台劉振警家寔
貧夫傭工氏奉養翁姑克盡婦道姑年高又嬰宿疾呻吟牀第日
漸彌留氏每跪禱北辰以祈病愈一夜夢白髮翁入室持丹藥一
粒授之囑以緊握語訖而寤手猶握臂氏自思曰神得毋示吾剖
臂以療親疾耶乃覓利刃剖臂肉雜藥餌以進姑病遂瘳鄉耆擬
請旌表以格於例未果

楊商氏 邑南商家營子商洛豐之女適交界甸子楊某生一女
而夫亡翁姑屢諷之嫁氏弗從舅陰與惡少某謀篡取以去甫入
門氏即大罵某露刃脅之不為動某益怒褫其上衣懸諸梁筆楚

交加昏而復甦者再氏罵益烈矢死靡他會母家訟於官事始解
時縣令斥其舅判令撥腴田若干畝歸氏經理准其立姪承桃以
嘉厥志

孫節婦素貞傳

孫節婦名素貞性情賢淑精女紅識文字年十八于歸李明經華
如公長子在全為室在全幼承庭訓刻苦力學因進銳嬰咯血疾
婦晝夜侍側食必躬進藥必親嚙姑諭令少息垂涕對曰夫一息
尚存婦尚有夫病勢如此欲長在榻前能乎未幾在全病不起婦
痛不欲生有殉亡之志姑泣曰兒死家無次丁風燭何所依留汝
身以養我二人汝夫在地下亦瞑目矣婦始收淚允諾勉襄喪葬

哀毀盡禮時于歸未及三月也矢志守孀屏黜鉛華足不踰閭次
年庶姑生夫弟逢春其翁曰日後汝弟生子定必繼汝為嗣以慰
汝守節之志其弟四歲祖姑翁姑相繼逝世門庭內僅一孀婦撫
一弱弟一切衾殮葬祭皆婦一人主持無不盡禮盡哀戚族交贊
其賢婦視夫弟如愛子飲食教誨備極誠懇年稍長即令入塾讀
書每誠以發憤勤學無替家聲厥後其弟逢春得有成就皆婦教
導之力也其弟生子五以四子秉章承桃焉清光緒十七年邑紳
上其事奉旨准建坊旌表民國十二年其弟逢春充黑龍江軍政
兩署諮議經該省督辦吳呈奉大總統獎給柏節松操匾額民國
十七年卒年八十六歲入祀本邑節孝祠焉

人物

明

仙釋

馬真一 河南人年百餘歲矣明季居廣寧之北鎮廟中採蘑菇野果為食會廣寧大旱經略袁崇煥使禱雨立應後去之山海關與士人談經論藝剖判如流為人言休咎率奇驗後不知所終

清

顛僧 廣寧人不知姓名頗顛常與羣兒戲或畫兒掌中使拳

之放拳則雷聲殷然兒輩往往乞雷以為笑樂又能煮石為糧或與羣兒食之以為味如芋也善醫請療者身到即愈後一難產家

延之僧不肯行強之至門而婦遂產僧頂暴裂膿血不止每悵然
曰吾行已壞真冤孽也從此不復至人家來就醫者或以膿血塗
之往往而愈後不知所終

本盛京通志

寶和尚 邑東于家窩堡人俗姓楊幼業農年二十許家人為議
婚迎娶有日矣乃遁入城西觀音洞為僧終歲苦行人亦未之奇
也嗣遇異僧授以修煉之術閉門跌坐無間寒暑弟子皆雲遊四
方僅一行者司門戶供灑掃時或謂行者曰某人來謁已在途矣
行者嗤之已而聞剝啄聲其人果至時方暮春忽曰江南大麥已
黃矣行者又嗤之乃出數穗於袖中若新折諸隴畔者蓋已瞬息
千里其神妙不測類如此年八十餘猶健一日令行者徧召知交

告以遠行至日中鼻垂玉筋長尺許端坐而逝有鄰村某自義州
來者遇和尚於途跨一黑衛詢以何往曰遠矣遠矣及歸始知僧
已圓寂蓋尸解云

仙	列							方	文							
釋	全	女	全	全	全	全	全	伎	全	學	全	全	全	全	全	全
× ₀	六五	六 ₀	五八	全	全	全	五×	五六	全	五二	全	三×	三六	三四	三 ₀	二九
六	三	一×	二 ₀	一八	一四	一三	二	一×	八	×	一×	一五	二	一八	一三	一
九	九	二	四及五	二	二	一八	一×	三及四	八	二四	三	一六	一九	二四	一三	二二
判	失	真	妙入	弗	使	使	從	十×	奇	江	託	聰	忘	註	祠	利
決	矢	貞	入妙	員	史	史	胞	十×	寄	江	比	胎	妄	註	祀	刑